


KISALU YA NZAMBI YA KULUNGA YINA ME TALISAMA

 Matondo mingi, na nge, mpangi ya bakala. Billy zola ti mu tuba ti yayi kele mbala ya munu ya ntete na chaire, na bangonda tatu. Mpe yandi. . . Mu ke bambuka moyo na mbala ya ntete mu bakaka yandi, na kupesa kimbangi, yandi tubaka, “Kima ya ntete, mu kele na boma.” Munu, mpe. Ya me kuma na kutala bamvula makumi tatu na tanu na ministele, mpe yayi kele ntangu ya kulutila yinda mu me bikaka chaire tuka mu kele na ministele. Mu vwandaka na nsatu ya kupema fyoti, na yawu Mpangi Mosley mpe munu, mpe bampangi yankaka awa, vwandaka na nzyetolo ya fyoti ya kuzomba. Mpe beto me pema ntangu yayi. Mpe yayi kele lukutakanu ya munu ya ntete kubanda mu me. . . na kutala ya ntete na Ngonda ya yivwa. Mpe ya kele kima. . . ministele kele kima na kutala beno fwana kukangimina.

² Mpe ntangu yayi mu vwanda me lomba bawu na kufwa ventilatele yina, to kumona kana bawu lendaka kufwa yawu, samu ti mu zaba ti ya kele mpasi na kuwa. Mpe ya kele mpasi, mu zaba, ntangu muntu vwandaka pesa kimbangi ya bawu. Ya vwandaka mpasi samu na munu na kuwa bawu. Beno nyonso lenda kuwa mbote ntangu yayi? Mbote. Mu zaba ti ya kele fwana kutelama pene-pene ya miklofone yayi tii ba ke yidika yawu.

³ Yayi kele kieleka bweso ya nene samu na munu, mpe mu—mu ke vutula kieleka matondo na ntwadisi, mpe na kapu ya Bantu ya Mumbungu ya Nsangu ya mbote ya Muvimba awa na Yuma, mpe na milongi nyonso. Miyimbidi yayi ya mbote awa, bayina vwandaka na zulu awa mwa ntangu fyoti me luta, mu ke zola kuwa bawu na—na lukutakanu. Kieleka ya vwandaka mbote. Mu—mu vwanda kukiyufula kaka, ntangu bawu vwandaka yimba, kana Jean monaka munu. Mpe mu banza ti yandi monaka. Mpe, na yawu, mu me kuwa ti beno kele na reveil awa. Mfumu kusakumuna beno mingi, mpangi ya bakala mpe mpangi ya kento, na yina beno kele na ya kusalu. Mpe na bankundi ya munu nyonso na Phoenix mpe bisika yankaka, yina kele. . . mpe kuna na Californie.

⁴ Mpe mu zola kaka kutuba dyambu mosi na yina me tala makapu. Ntangu mu kwizaka na bantu ya Pentecote, mu vwandaka. . . mu kuzwaka nzingulu ya pentecote, na kuzabaka ve ti ya vwandaka na dibuundu ya Pentecote. Kuna mu vwandaka Missionaire ya Baptiste. Mu kuzwaka mbotika ya Mpeve-Santu, mpe mu monaka ti ya vwandaka na bantu yina

kwikilaka kima mutindu mosi na yina mu kuzwaka. Mpe bawu kuzwaka yawu bamvula makumi yiya ntete mu kuzwa yawu. Na yawu mu vwandaka kaka muntu, mutindu Paul tubaka, mu banza, ve na kumeka na kutuba mutindu yandi, kasi mutindu “muntu me butama na ngaanda ya nsungi.” Kasi . . . Bampangi ya munu vwandaka banza ti mu me beba, na kutala na mudindu mingi, mutindu beto ke bokilaka yawu. Kasi mu—mu zabaka ti mu kuzwaka kima mosi. Na yina, nzingulu ya munu vwandaka kaka mutindu bawu kuzwaka yawu kuna. Mpe ya kele mutindu mu zola yawu.

⁵ Mpe, kasi ntangu mu kwizaka na kati ya bawu, kima ya kunyongisa na yawu, Mu monaka ti bawu vwandaka kaka ya kukabuka, na ba-denomination ya mutindu na mutindu, mutindu dibuundu ya munu ya Baptiste vwandaka. Mpe bawu . . . Mu vwandaka banza ti ya vwandaka kaka na mosi yina ba vwandaka bokila Pentecote, mpe ya vwandaka yina. Kasi, mu bakulaka ti, ya vwandaka na ba-denominastion mingi na kati ya bawu. Na yawu, mu . . . bawu nyonso vwandaka mbote. Mu zaba ti ndambu ya bantu ya kulutila mbote yina mu me kutanaka ntete, na luzingu ya munu, vwandaka na bimvuka yayi. Mpe bawu vwandaka—bawu vwandaka, ya kieleka, na ba-denominatiom yankaka. Mpe ya munu—dibanza ya munu vwandaka ti beto zolaka vwanda ntima mosi, na Klisto, mpe mu me kumaka ata mbala mosi ve ya denomination mosi na kati ya bawu. Mu ke vwandaka kaka na kati-kati ya bawu, mpe ke mekaka na kusimba maboko nyonso zole, mpe maboko nyonso, mpe kutuba, “Beto kele bampangi.” Beto kele ve . . . Beto lenda mona mwa bima na mutindu yankaka, mosi na yankaka. Kasi, na ngaanda ya nyonso yina, beto kele dyaka bampangi, samu ti beto me butama na Mpeve mosi. Beto kele dibuta ya Nzambi.

⁶ Na yina ntangu bantu ya Mumbongo ya Baklisto, Bantu ya Mumbongo ya Nsangu ya mbote ya Muvimba, kapu yayi, mu vwandaka na kati ya balukutakanu ya ntete na Mpangi Shakarian. Mu zabaka yandi ntete organisation kuvwanda, to ti organisme kuvwanda. Mu banzaka ti ya vwandaka kima ya nene. Mpe ya me vwanda kyelo ya kuzibuka samu na munu, samu na kuziyeta na bayinsi na Bantu ya Mumbungu ya Nsangu ya mbote ya Muvimba yayi.

⁷ Kisika, bantangu yankaka, ti beno ke tala kimvuka mosi ya milongi, ntangu yankaka, bawu ke vwanda na mwa kima na kimvuka yankaka, samu ti muntu mosi tubaka kima mosi. Ya kele ve bisika nyonso, kasi beto ke talaka yawu na bizunga. Mpe mutindu, kana dibuundu mosi zola kusimbisa yawu, yankaka yina ke vwanda na kima ve ya kusala na yawu.

⁸ Kasi na Bantu ya Mumbungu ya Nsangu ya mbote ya Muvimba, yawu me vwanda kyelo ya kuzibuka samu na munu. Ntangu ba ke kwiza, kuna mu ke nata bampangi ya munu nyonso kintwadi, mpe beto—beto lenda vukana na kisalu; ya lendaka

vwanda ti ba-pasteur zole vwandaka na sensasyo mosi, to kima mosi. Yayi me vwanda kyelo ya nene ya kuzibuka, mpe mu me zyeta na bayinsi samu na bawu ntangu yayi ya me kuma bamvula, na kuzonzaka na makapu ya bawu.

⁹ Mpe mu . . . Yuma kele ve ya kieleka mbanza mosi ya nene, ata yina mu banza ti ya kele ya kulutilla nene na mbanza yina mu me katuka, na Jeffersonville, na Indiana. Kasi mu kutanaka na ntwadisi ya beno awa . . . yandi vwandaka . . . mpe mosi na mosi ya bantu ya kapu ya beno. Mpe mu banza ti beno kele na bweso mosi ya mbote awa.

¹⁰ Mu vwandaka banza kaka, na nkokilla yayi, na yina mu vwandaka ya kuvwanda awa mpe vwandaka tala bantu. Beno zaba, ntama mingi ve beto ke basika na bweso yayi. Kimvuka ya Yinza ya Mabuundu ke mina beto. Mu banza ti mingi ya bantu ya munu na nkokilla yayi kele ba-Pentecotiste, mpe ba-Baptiste, mpe—mpe Dibuundu ya Nzambi, mpe bayina kele na ngaanda ya Kimvuka ya Yinza ya Mabuundu. Mpe—mpe bawu, ya kele yina kaka bawu salaka, mpe ya kele yina Biblia tubaka ti bawu ke sala. Mpe ba kebisaka beto na yawu, na yawu beto vwanda na ngaanda ya yawu. Mpe mutindu mosi ya me zonzama na nkokilla yayi, na nkunga, na Nkwizulu ya Mfumu yina me belama, ya lendaka vwanda ya kubelama mingi kulutilla beto ke banza ya kele.

¹¹ Mpe mu banza ti ya kele ntangu beto ke vukana kintwadi na mutindu yayi ya kubundana, ya ke salaka kima na beto, yina ke belemisa beto na mosi na yankaka. Mpe na yina beto ke belama na mosi na yankaka, beto ke belama mpe na Nzambi, samu ti Yesu tubaka, “Bambala nyonso yina beno me sala na fyoti ya bana ya Munu yayi, beno me sala yawu na Munu.”

¹² Mu kele na mwana mosi ya bakala ya fyoti awa kisika mosi, mu banza, Joseph. Mu kele na Billy ya kuvwanda awa. Bana zole ya bakento ya kuvwanda na manima kuna, mpe kento ya munu. Ntangu yayi kana muntu vwandaka na kima yina vwandaka . . . ti beno zolaka sala kieleka kima ya mbote, Mu ke zola mingi ti beno sala yawu na bana ya munu kulutilla kusala yawu na munu. Mpe na yawu mu ke kuwa mu banza, na kuvwandaka kibuti, mpe Yandi kele Yinto ya kibibuti, mu banza ti ya kele mutindu Nzambi ke kuwaka. Kana beto fwana . . . Beto ke sadila Yandi mutindu beto ke sadila mosi na yankaka. Ya kele mutindu beto ke sadila Nzambi.

¹³ Mpe na kuzabaka ti yayi kele kieleka, na yina mu banza ti ntangu nyonso yina kapu yayi ke kutana, yawu na kuvwandaka inter-evangelique . . . Ya kieleka ya kele na ata malongi mosi ve yina Bantu ya Mumbungu ya Nsangu ya mbote ya Muvimba me telama. Bawu me telama kaka samu na Nsangu ya mbote ya muvimba. Mpe kana muntu tala mutindu yankaka, ya kele kieleka nyonso ya kulunga. Ya kele nyonso ya kulunga. Na

mutindu nyonso, beto ke bundana. Na yawu mu banza ti ya ke vwanda . . . Kana mu vwandaka zinga awa na mbanza yayi, mu banza, ntangu kapu yina ke kutanaka, kana ya lendaka salama na mutindu nyonso, mu ke vwanda kuna mpe ke kuzwa bantu nyonso kuna yina mu lendaka nata kuna. Ya kele kieleka, samu ti ya kele—ya kele kima yina ke pesa beto ngolo kintwadi.

¹⁴ Mu ke zingaka na Tucson, mpe mu ntangu nyonso ke zonzaka na kapu yina, ntangu nyonso. Mpe na Phoenix, tuka mu me kwenda na Arizona, mu ke vwandaka na Phoenix ntangu nyonso mu ke kuzwaka siansi ya kubasika mpe kukwenda na—na Phoenix, samu . . . mpe mu ke mekaka na kunata muntu mosi na munu, kubokila muntu mosi, kunata milongi yankaka.

Mpe bawu ke tuba, “Mbote, mbote, nge me mona, Mpangi Branham, beto lenda ve.”

¹⁵ Mu ke tuba, “Beno kipe ve yina beno . . . Beno kwenda kaka na munu. Beno kwenda kaka mutindu nkundi, na munu.”

¹⁶ Mpe mu ke nata bawu kuna mwa ntangu fyoti. Ya kele kaka yina beno fwana sala. Mpe beto ke tala ti, konso ntima ya muntu kele na nzala ya kubundana. Mpe beto zolaka sala mutindu yina. Ya kele kidimbu ya nene ya ntangu ya nsuka. Nzambi sakumuna kapu yayi. Bika ti—bika ti ya vwanda tii ntangu Mfumu Yesu ke kwiza kubaka beto na Nkembo, ya kele kisambu ya munu.

¹⁷ Ntangu yayi, mu ke bambuka moyo na nzyetelo ya munu ya ntete na Yuma. Mu vwandaka na Ford ya Modele-T yina lendaka kwenda mbangu na bakilometele makumi yiya na nana na ngunga mosi. Mu vwandaka banza na yina mu vwandaka nata ditoma bubu yayi. Mu kele dyaka ya kukwikama na Ford; mu kele dyaka na mosi, mpe kuzwaka kima yankaka ve kasi kaka yina. Kasi mu . . . Ntangu yayi, mu ke teka ba-Ford ve. Ntangu yayi, ya kele ve publisite ya yawu. Beno me mona? Kasi mu ke bambuka moyo na mutindu Ford yina . . . Mingi ya beno bampangi ya bamvula ya munu ke bambuka moyo na Ford ya ntama ya Modele T. Yayi vwandaka na mvula 1927. Beno zolaka tala kieleka mbote to beno zolaka tala Yuma ve na ntangu beno vwandaka luta. Ya vwandaka kieleka fyoti, mpe ya kieleka beno me kuma nene. Kasi, mutindu mu kumaka na bakilometele makumi yiya na nana na ngunga mosi na Ford ya munu, ya vwandaka tambula bakilometele makumi zole na yiya na ngunga mosi mutindu *yayi*, makumi zole na yiya mutindu *yayi*. Na yawu, beno tula yawu kintwadi, mu vwandaka na bakilometele makumi yiya na nana na ngunga mosi, na bankunki nyonso mpe nyonso yina. Yuma me kuma nene.

¹⁸ Dibuundu yayi ya nkembo, yina, beto ke—beto ke na kunwanila samu na Lukwikilu yayi ya mbote.

¹⁹ Matondo na nge, mpangi ya bakala, muntu nyonso yina me sala yawu.

20 Yawu me kula, mpe, mpe beto ke vutula matondo samu na yawu. Mfumu kusakumuna beno nyonso.

21 Beto banza ti, kana beno kele na kizunga, pene, ya mosi ya balukutakanu yayi. . . Mu ke zonga, na kapu na Phoenix, Lumingu ke na kwiza. Mpe Lumingu yina ke landa na Flagstaff. Mpe na Kilumbu ya ntete yina ke landa, na kilumbu ya makumi zole na mosi, ya ke vwanda na feti ya nene na Tucson. Ba me bokila beno nyonso.

22 Mpe, kana Mfumu kuzola, mu ke zola kuzonga na kivinga ya bale ya Westward Ho Hotel, mu banza. Wapi nkokila ya ke banda? [Muntu mosi me tuba, “Ya kele na Lumingu na manima ya midi, na kilumbu ya kumi na sambwadi.”—Mu.] Lumingu na manima ya midi, na kilumbu ya kumi na sambwadi, kaka lukutakanu ya fyoti ya kumwangisa nsangu. Mu banza ti miyimbidi yayi ke vwanda na kizunga, pene na ntangu yina, samu na kusadisa beto. Mpe beto ke vwanda kuna tii na Kilumbu ya tatu. Mu banza ti ya kele Lumingu na manima ya midi. Mpe beto ke salaka yawu samu ti beto zola ve kuzenga mosi ya bandandani ya mabuundu. Na yina, na Kilumbu ya ntete mpe na Kilumbu ya tatu, mpe kuna na Kilumbu ya tatu beto kele na Ra- . . . na Weset- . . . Na Auberge Ramada, na Auberge Ramada. Mpe na manima na Kilumbu ya yiya beto ke banda na Weseward Ho. Ya kele mutindu yina?

23 [Mpangi mosi ya bakala me tuba, “Na Westward Ho, Lumingu, Kilumbu ya ntete, na Kilumbu ya zole. Na manima beto ke kwenda na Auberge Ramada, na Kilumbu ya tatu, mpe beto ke vwanda kuna tii na lukutakanu.”—Mu.] Lukutakanu ke suka, na Auberge Ramada. Na yawu beto ke vwanda na kyese na kuvwanda na beno na ntangu nyonso.

24 Ntangu yayi, ntete beto zibula Buku yayi, beto kulumusa yintu ya beto kaka na mwa ntangu fyoti mpe kuzonga na Mfumu ya Yawu.

25 Ntangu yayi, na bayintu ya beto ya kukulumusa na fundu-fundu kisika Nzambi bakaka beto, mpe, kana Yesu vutula bilumbu, beto fwana vutuka kilumbu. Kaka tuka mu kele awa, mu me kuzwa nsangu me katuka esete, ti ntwenya mosi ya mama yina mu zabaka. . . Yandi kele ntwenya ya kento ba vwanda bokila Edith Wright. Yandi me kwenda kutana Nzambi, na manima ya midi yayi, na ngunga ya tatu. Beto fwana vutuka. Kana ya kele na muntu awa yina ke zola ti ba bambuka yandi moyo na kisambu, beno zola kaka kutelemisa diboko ya beno na Nzambi. Nzambi sakumuna beno.

26 Tata ya Mazulu, mutindu beto me sepela mingi na kubundana yayi ya mbote, kuyimba, oh, mutindu ya me ningisa ntima ya munu na ntangu mu me kuwa nkunga yina, *Jean Monaka Munu?* Tata, mu ke na kivuvu ti beto nyonso ke vwanda kuna, mosi na mosi ya beto. Mpe beto ntangu yayi me kulumusa

na lweka ya fundu-fundu, mpe beto—beto ke sambila ti Nge ke ndima ya beto—ya beto kuvutula matondo, mpe kubalula ntima ya beto, mpe kisambu ya beto samu na mosi na yankaka.

²⁷ Mpe ntangu yayi beto ke zibula Ndinga ya Nge, kitini ya santu ya lukutakanu yina ke monana ya kulutila santu na—na nyonso, samu ti beto zaba na ntangu yayi beto ke kipe bantu, samu na kutwadisa bawu na Kieleka, na Klisto mpe na Ndinga, yina kele Klisto. Mpe beto ke sambila ti Nge ke zibula Ndinga samu na beto. Beto—beto kele ya kulunga ve, Mfumu, kasi Nge kele nyonso ya kulunga. Na yawu mu ke sambila ti Nge sakumuna mwa mangolo ya beto ya kulemba, mpe ti beto na nkokila yayi kutala beto mosi mpe kisika ya beto na Ndinga ya Nzambi. Pesa yawu, Tata. Mpe beto ke pesa Nge lukumu, samu ti beto me lomba yawu na Nkumbu ya Yesu. Amen.

²⁸ Ntangu yayi, yayi kele kieleka mbote na kuvwanda awa. Mu kele na mwa banoti awa yina mu ke tala, mwa baminuti fyoti, samu ti mu zaba ve kana beto kele na muswa ya kubaka kivinga ya nene yayi bangunga ya yinda na nkokila yayi. Mpe mu kele fyoti, mpe, na kati ya bantu ya Pentecote, mu kele mwa malembe, beno zaba.

²⁹ Mu me bambuka moyo. Mu banza ti, mu tubilaka beno yawu. Na ntangu mu monaka mulongi ya ntete ya Pentecotiste, ya vwandaka Révérend Robert Daugherty ya Saint Louis. Mu zaba ve kana mosi ya beno zabaka yandi. Beno monaka kimbangi ya ntwenya ya mwana ya yandi ya kento na buku. Yandi vwandaka—yandi vwandaka . . . Yandi belukaka na kimbevo ya danse ya Santu Vitus, mpe ba bikaka yandi. Mpe ya kele mutindu mu kutanaka na bantu ya Pentecote ya ntete.

³⁰ Mpe, yayi, mu kwendaka kuwa yandi kulonga, mpe—mpe, oh, la la, yandi—yandi zabaka kulonga. Yandi zolaka . . . Yandi zolaka vingila na kima mosi ve. Mpe yandi vwandaka longa tii yandi vwandaka na mpasi na kupema, mpe yandi vwanda kuma bleu na kizizi, mpe makoto ya yandi vwanda lemba, mpe yandi vwanda na kutala vwanda simba ntoto. Mpe kana yandi kuzwa kupema ya yandi, beno lendaka kuwa yandi na nsuka ya mbanza kuna, na kutala, ke telama na kulonga. Mpe mu vwandaka banza, “Oh, mu—mu lenda banza kaka ve na mbangu mutindu yina.”

³¹ Mu fwana baka kaka ntangu ya munu. Mu kele fyoti malembe, mpe mu ke na kukumaka kiboba, mpe, beno zaba, mu ke kwendaka malembe, na yawu mu banza ti beno ke vibidila munu baminuti fyoti.

³² Ya kele na kima mosi kieleka, ti mu zaba ke kubwa ve, mpe ya kele Ndinga ya Yandi. “Mazulu mpe ntoto ke luta, kasi Ndinga ya Yandi ke kondwa ata mbala mosi ve.” Na yawu beto baka ntangu yayi, kana beno kele na Biblia ya beno, mpe ti beno zola kutanga na Yawu, na Buku ya Esaie, na kapu 53 ya Esaie. Mu ke

zola kutanga yayi kaka samu na kutunga, kuzwa bisono samu na kutungila dibanza, samu na mwa ntangu fyoti.

Nani me kwikila nsangu ya beto? . . . na nani diboko ya MFUMU me monana?

Samu ti yandi ke basika na ntuala ya yandi mutindu kimenina ya pete, mpe mutindu nsimbulu ya ntoto ya kukawuka: yandi kele na ata nzutu to ata kitoko; mpe ntangu beto ke mona yandi, ya kele ve na kitoko yina beto lendaka zola yandi.

Ba me yina mpe me manga yandi na bantu; muntu ya mpasi, . . . ya kumesana na mpasi: mpe ya vwandaka mutindu beto bumbisaka bizizi ya beto na yandi; ba vwandaka yina yandi, mpe beto zolaka yandi ve.

Ya kieleka yandi nataka mawa ya beto, mpe nataka bampasi ya beto: kasi beto talaka mutindu ba bulaka yandi, ba bulaka yandi na Nzambi, mpe ba me pesa mpasi.

Kasi yandi lwalaka samu na masumu ya beto, ba kufwaka yandi samu na disumu ya beto ya nko: kitumbu ya ngemba ya beto vwandaka na zulu ya yandi; . . . na bamputa ya yandi beto me beluka.

Beto nyonso vwandaka mutindu mameme ke yungana; beto balukaka mosi na mosi na nzila ya yandi; mpe MFUMU . . . bwisisaka na zulu ya yandi disumu ya beto nyonso ya nku.

Ba nyokolaka, mpe talisaka yandi mpasi, kasi yandi zibulaka ve yinwa ya yandi: ba nataka yandi mutindu mwana-dimeme na kufwa, mpe mutindu dimeme na ntuala ya mizengisi-mika kele baba, . . . yandi zibulaka ve yinwa ya yandi.

Ba katulaka yandi na boloko mpe na lufundusu: mpe nani ke samuna na nsungi ya yandi? samu ti ba katulaka yandi na yinsi ya bantu ya moyo: mpe samu ti . . . masumu ya bantu ya munu ba bulaka yandi.

Mpe yandi salaka ntoni ya yandi na bantu ya yimbi mpe na bavwama na lufwa ya yandi; samu ti yandi salaka ata kima ya ngolo ve, to vwandaka kuna na ata luvunu na yinwa ya yandi.

Kasi ya sepelisaka MFUMU na kufwa yandi; yandi nyokolaka yandi: ntangu nge ke sala moyo ya yandi munkayulu samu na disumu, yandi ke mona nkuna ya yandi, mpe yandi ke kumisa yinda bilumbu ya yandi, mpe kusalu ya MFUMU ke kwenda ntuala na maboko ya yandi.

Yandi ke—Yandi ke mona kusalu ya moyo ya yandi, mpe ke vwanda na kyese: na luzabu ya yandi kisadi ya

munu ya kudedama ke vedisa mingi; samu ti yandi ke nata disumu ya bawu ya nko.

Na yawu mu ke kabula yandi ndambu ya bantu ya nene, mpe yandi ke kabula bute na bantu ya ngolo; samu ti yandi. . . mwangisaka moyo ya yandi na lufwa: mpe ba tangaka yandi na lutangu ya misumuki; mpe yandi nataka masumu ya bantu mingi, mpe salaka bisambu samu na misumuki.

³³ Mu zola kaka kutuba yayi, samu na mwa dilongi kaka. Mu zola kubaka dilongi kuna, mutindu: *Kisalu Ya Nzambi Ya Kulunga Yina Me Talisama.*

³⁴ Ntangu yayi, yayi zolaka vwanda bisono ya kutanga, samu na kubasisa kisalu ya kulunga. Kasi ntangu beto ke tala na yawu, mutindu beto ke banza, ya ke vwanda nyonso yankaka kasi kisalu ya kulunga, samu ti ya kele ya kutuba, “Beto bumbisaka bizizi ya beto na Yandi, mpe ya vwandaka ve na kitoko ti beto zolaka zola Yandi.” Mpe bambala mingi, yina beto ke bokila kisalu ya kulunga, na yina Nzambi ke vwanda na kima ve ya kusala na yawu. Samu ti, ndwenga ya muntu kele bulawu samu na Nzambi, kasi bulawu ya Nzambi kele na ndwenga mingi kulutila ndwenga nyonso ya muntu.

³⁵ Mpe beto ke mona awa, ti Nzambi me pesa beto kifwanisu ya kima. Mu ke zola kumeka kunata kifwanisu yayi na ntwala ya beto, mutindu mu ke tala ti ya lendaka vwanda ntangu ya nsuka ti bayankaka ya beto ke kutana dyaka kintwadi. Ya lendaka vwanda ti beto ke mona dyaka ve mosi na yankaka mutindu beto kele ntangu yayi. Na yawu, kana beto me vukana samu na lukanu yayi, ve samu na kumonana to samu na kuwa beto . . .

³⁶ Kasi beto me kuzwa kubundana ya beto mosi na yankaka na yina beto me kudya madya yayi ya kitoko na nkokila yayi, na ziunga ya mesa, na yina beto me dikisa banzutu ya beto, mpe ntangu yayi beto ke zola ti Nzambi kudikisa moyo ya beto na Mani ya Yandi yina me bumbama. Kaka banganga-Nzambi yina vwanda kota na kisika ya Santu ya kulutila santu vwandaka na muswa ya kudya Madya ya Yandi.

³⁷ Mpe kana beto tala, na nkokila yayi, ya beto—ya beto bifiteki, mu zaba ve kana mu me kuzwaka ntete feti ya nene, na bisika mu me kuzwaka balukutakanu, mutindu na nkokila yayi, ti mu me kuzwaka kitini ya mbote ya bifiteki mutindu bawu me sadila na nkokila yayi. Ntangu yayi, beno me mona, samu ti beto fwana kuzwa yayi; kana beto zinga, kima fwana kufwa samu beto sepela ntangu ya kubundana yayi, mpe dyaka samu na kusimbidila baluzingu ya beto.

³⁸ Mu vwandaka solula na muntu mosi yina vwandaka muntu yina ke kudiaka kaka matiti, ntama mingi ve, mpe yandi tubaka na munu, “Mbote, mu—mu ke wisana na nge ve.” Mbote, yandi—yandi beto tuba fidisaka munu mukanda, vwandaka zola

kukutana na munu na kingenga. Mpe yandi tubaka, “Mpangi Branham, mu ke talaka nge ntangu nyonso mutindu muntu ya santu.” Yandi tubaka, “Kasi ntangu mu kuwaka nge kutuba ti nge kudyaka jamba mpe meki na madya ya suka,” yandi tubaka, “yina—yina nyongisaka munu.”

³⁹ Mbote, ti, mu zola ve kutula ditadi yina ke bwisa na nzila ya yandi. Ntangu yayi, yina kele mutindu ya yandi ya kukwikila. Kasi mu tubaka, “Mbote, tata, kana mu kudya ve, mu ke zinga ve.”

⁴⁰ Yandi tubaka, “Kasi, nge me mona, ya me lunga ti nge kufwa ngulu, mpe—mpe kufwa nsusu.”

⁴¹ Mu tubaka, “Tata, beto ke zingaka kaka na nzila ya kima ba me kufwa. Mu ke kipe ve yina nge ke kudya. Nge ke kudya matiti. Beno ke kudya. Nge ke kudya dimpa, blé ke kufwa. Kana nge kudya masangu, disangu ke kufwa. Kana nge kudya madeso, madeso ke kufwa.”

⁴² Nyonso yina beno ke kudya, beno lenda zinga kaka na nzutu samu ti kima me kufwa samu ti beno zinga. Ntangu yayi, nyonso yina beno ke sala, ata kunwa miliki, ba-microbe, nyonso yina, beno fwana kuzingila na nzila ya kima ya kufwa. Mpe ya ke na kulakisa kaka, kana beto fwana kuzinga luzingu ya kimuntu yayi, mpe beto lenda sala kaka yawu na nzila ya kima ya kufwa, kima fwana kufwa samu ti beto zinga ya Seko. Ya kele Yesu Klisto, ti Nzambi pesaka beto mutindu kipiku.

⁴³ Mpe ntangu yayi, ntangu mu kutanaka na bantu ya Pentecote, Mu—mu kwendaka na Californie, kaka na Etat ya kubelama na awa, na simu yankaka ya nzadi. Mpe mu vwandaka na Los Angeles. Mu zingaka ata mbala mosi ve na bilumbu ya mama ya mulongi ya kuzabana yayi, Mama Semple . . . Aimee Semple McPherson. Mu lendaka na kukutana na mwana ya yandi ya bakala, Rolf, Muklisto mosi ya bakala ya mbote, mpe—mpe kento ya yandi mpe dibuta ya yandi. Ya kieleka bawu kele bantu ya luzolo, mpe Docteur Teeford mpe bantu mingi ya Angelus Temple. Mpe mu longaka Jubilé ya Pentecote, bamvula makumi tanu ya Jubilé kuna, bamvula fyoti me luta, mpe ya kieleka kuzwaka ntangu mosi ya mbote.

⁴⁴ Na yawu na buzitu na kento yayi yina lakisaka nsungi na mutindu yandi salaka, na kumekaka na mutindu ya yandi nyonso, mpe samu—samu na kulakisa yina vwandaka na kati ya ntima ya yandi, mu zitisaka yandi na kukwendaka na ntoni ya yandi na Forest Lawn. Mpe mutindu mu telemaka kuna na yimpu ya munu ya kukatula, mpe—mpe kukulumusa yintu ya munu mpe vutulaka matondo na Nzambi samu na luzingu ya ntalu ya mwa kisadi yayi ya kento, na yina kuna ba lombaka munu na bantu yina vwandaka na munu, nkonga ya milongi, kana mu zola kutambula na . . . na kizunga ya Forest Lawn. Mpe kuna na kati ya yinzo ya bamvumbi, to mutindu nyonso yina

beno ke bokilaka yawu, mu vwanda tala mutindu na mutindu ya bifikulu, mpe monaka ya Madya ya Mfumu, mpe mu vwandaka. Mingi ya beno talaka yawu, ntangu ba namisaka minda na zulu ya yawu, na Madya ya Nsuka, mpe kuwaka disolo ya yawu.

⁴⁵ Kasi mosi ya bima ya kulutila mbote yina mu monaka kuna, vwandaka na yina beno ke kota na kyelo, mu banza ti ya lendaka vwanda na lweka ya esete. Ya vwandaka na kiteki ya Moise ya kuvwanda kuna, yina vwandaka kisalu ya kulutila nene na luzingu ya Michel-Ange, Mu banza ti ya vwandaka, kisadi-biteki yina . . . Mu lenda sala yimbi na muntu yango, mu banza ti ya kele kieleka, Michel-Ange, yina—yina . . . kisadi-biteki ya nene yina salaka yayi, to, kifwani ya Moise. Mpe mutindu yandi vwandaka bangula yawu, ntwadisi yina vwandaka twadisa beto, yandi tubaka ti yina vwandaka mosi ya bisalu ya kulunga ya kulutila nene yina Michel-Ange salaka ntete. Mpe yandi tubaka ti ya bakaka bilumbu mingi ya luzingu ya yandi, ya vwandaka kisalu ya mpasi.

⁴⁶ Mpe mu talaka, mu banza ti ya vwandaka, na dikoto ya kibakala. Kiteki vwandaka tala ya kulunga, ya mbote, mpe Moise na mesa ya misiku na diboko ya yandi, na mandefo ya yandi ya yinda. Mpe ya kieleka, ya vwandaka, dibanza na yintu ya Michel-Ange, mutindu Moise zolaka vwanda na kutala. Ya lendaka vwanda ti yandi ata mbala mosi ve monaka foto, kasi, na kati ya dibanza ya yandi mosi, yandi me basisa yina yandi banzaka na mutindu Moise zolaka talana.

⁴⁷ Mpe disolo ke tuba, ti ntangu kaka yandi manisaka kiteki, mpe lengulaka nyonso mpe na mutindu ya kulunga, yandi vutukaka manima na kumona kisalu ya yandi. Mpe na yina yandi kuzwaka ntwadusulu ya kimpeve ya nene, tii ya talanaka ya kieleka mingi . . . Yina yandi vwandaka na yawu na dibanza ya yandi, yandi salaka yawu na maboko ya yandi. Ya talanaka mingi mutindu yawu, mpe bamvula nyonso yandi vwandaka vingila na yawu, yandi kunatamaka mingi na lutwadusu ya kimpeve, ti yandi bulaka yawu na dibolongo mpe bokaka, “Tuba!” Mpe ya kele na kisika ya kupasuka na dikulu, na dibolongo ya Moise, kisika Michel-Ange bulaka na nzundu ya yandi, samu ti yandi vwandaka mingi ya kutwadisa na kimpeve.

⁴⁸ Beno me mona, ya vwandaka na kima na kati ya yandi, na kubanda, ti yandi fikulaka kifikulu na dibanza na mutindu yina yandi banzaka Moise fwana vwanda. Mpe ntangu yandi monaka yawu kutalana na ntwala ya yandi, kima kaka yina yandi vwandaka na yawu na dibanza ya yandi, yina mutindu yandi banzaka Moise ke talana; mpe yandi nataka vision yina na yandi bamvula mpe bamvula nyonso yayi, na yina yandi bakaka kitini ya nene ya granite, mpe me zenga kitini awa mpe kitini kuna, mpe me sala yawu, samu ti ya zolaka vwanda ya kulunga. Mpe na ntangu ya vwandaka ya kulunga na ntwala ya yandi, yandi—yandi me mona kutalana ya yina vwandaka na

kati ya dibanza ya yandi. Ya kele yina twadisaka yandi mingi na kimpeve, na kubula kifikulu, mpe kuboka, “Tuba!” Bamvula ya yandi nyonso ya kisalu ya mpasi futaka. Kisalu ya yandi ya nene kumanisaka.

⁴⁹ Ntangu yayi beto ke mona yawu, mpe mu—mu kuzwaka ntwadusulu ya kimpeve na nzila ya yawu, samu ti mu banzaka ti, ya kieleka, kidimbu na dikulu, ya kele yina salaka yawu, samu na munu, kisalu ya kulunga. Samu ti, kaka, kana ya vwandaka kaka kifwanisi yankaka, to kima mosi na Moise, mutindu mosi ya kizizi yina muntu mosi kuzwaka dibanza. Kasi, muntu yina vwandaka sala kisalu, ya sepelisaka yandi mingi ti yandi bulaka yawu. Mpe kidimbu na zulu ya yawu salaka yawu kisalu ya kulunga samu na munu, samu ti ya talisaka na mutindu ya kulunga yina vwandaka na kati ya dibanza ya yandi na mutindu Moise zolaka talana.

⁵⁰ Oh, mu telemaka kuna. Mu zolaka kwenda ntama mwa ntangu fyoti, samu na kubanza na—na yina ya zolaka kutuba samu na yandi, mpe—mpe yina ya zolaka kutuba na munu na ntangu yina. Na yina ya kwizaka na dibanza ya munu, na yayi yina mu zola kuzonzila beno.

⁵¹ Beto balula mabanza ya beto na Michel-Ange, na Kisadi-biteki ya nene, Nzambi ya Ngolo nyonso, Yina, na mbandukulu, ntete ya vwanda na kilumbu to kilumbu ya ntete, ntete ya vwanda na atome to molekule, Nzambi, na dibanza ya Yandi, vwandaka na muntu, na mutindu muntu zolaka talana, mutindu yandi zolaka vwanda, mpe mutindu yandi zolaka sala. Mpe Yandi zolaka ti muntu yina kuvwanda kitini ya Yandi, “Na yawu Yandi salaka muntu na kifwanisu ya Yandi mosi, mpe na kifwani ya Nzambi Yandi vangaka muntu,” oh, ntangu Nzambi, na mbandukulu, salaka kisalu ya kulunga yayi, kima yina talisaka mabanza ya Yandi.

⁵² Beno bambuka moyo, ya kele kaka na mutindu mosi ya Luzingu ya Kukonda nsuka, mpe ya beto. . . ata mpe bankumbu ya beto mpe mabanza ya beto vwandaka na Nzambi ntete yinza kusalama. Samu ti ntangu yayi beto kele na Luzingu ya Kukonda nsuka. Mpe na kuvwanda yina, beto fwana vwanda kitini ya Nzambi. Na yawu beto zolaka vwanda mingi na mabanza ya Yandi, samu ti beto kele na Luzingu ya Kukonda nsuka, mpe vwandaka ya kusoola na ntwala na luzingu yayi. “Mpe ba tulaka bankumbu ya beto na Buku ya Luzingu ya Mwana-dimeme na ntwala yinza kusalama,” landila Apocalypse. Ntangu yayi, ti Nzambi vwandaka na beto na dibanza ya Yandi, na yina beto kele na Luzingu ya Kukonda nsuka, samu ti kuna Yandi me bokila beto, mpe beto me kota na luzingu. Mpe ndinga kele kaka dibanza yina me monisama. Nzambi vwandaka na beto, na mbandukulu, na kati ya mabanza ya Yandi.

⁵³ Ntangu yayi, mpe ntangu Yandi salaka Adam, muntu yina ya ntete, mutindu ya kulunga yandi vwandaka. Yandi vwandaka talana mutindu Nzambi. Nzambi, Mpeve-Santu ya nene, fukaka ntoto, mpe Yandi. . . bandeke basikaka, mu banza, mpe bibulu, bima ya mutindu na mutindu, mpe vwanda landila na kukuma mingi na mutindu ya Yandi yina vwandaka fuka. Tii, na nsuka, ya kwizaka kaka na espece ya kieleka mutindu Yandi yina vwandaka sala kufuka, Nzambi. Nzambi vwandaka, to, muntu vwandaka ya kusala na kifwani ya Nzambi. Na yina, ntangu Yandi tulaka yandi na nsaba yayi ya nene, mutindu Michel-Ange tulaka kisalu ya yandi ya nene ya luzingu, mpe mutindu bisadi-biteki nyonso ya nene, Nzambi tulaka kisalu ya Yandi na nsaba ya Eden, sadilaka yandi nsadisi. Wapi kilengi ya nene ya vwandaka samu na Nzambi, ti Yandi pemaka mpe. Ya vwandaka kaka kupema. kisalu ya Yandi manisaka.

Kuna disolo ya kyadi me kwiza, ya mbeni.

⁵⁴ Ntangu yayi beno tala. Yayi kele kima mu zola ti beno baka dibanza, ti Nzambi pesaka muntu yayi lukengolo. Yandi pesaka yandi. . . Yandi pesaka yandi ngolo na kati ya Ndinga ya Yandi, samu Yandi tubaka na bawu yina bawu lendaka sala, na yina bawu lendaka sala ve.

⁵⁵ Mpe ya kele na lufulu mosi beto kele ya kuvwanda bubu yayi, yina beto lenda sala, na yina beto lenda sala ve. Ata wapi mutindu mbote beto kele, ata bambala beto ke kwendaka na dibuundu, to ke salaka *yayi*, beto fwana butuka dyaka. Beno me mona? Ya fwana vwanda.

⁵⁶ Mpe Nzambi tubaka na Adam yina yandi lendaka sala mpe yina yandi lendaka sala ve. Yandi tulaka yandi na manima ya Ndinga ya Yandi.

⁵⁷ Mpe kuna mbeni kwizaka, na nzila ya luvunu, mpe me syelumuka na bibaka ya Ndinga ya Nzambi, samu ti kyelo vwandaka ya zibuka na yandi, mpe yandi bebisaka kifwanisu yina, na disumu. Ya kele mosi ya masolo ya kulutula mawa.

⁵⁸ Na kubanza, ti muntu yina ba salaka na kifwanisu ya Mvangi ya yandi, mpe yandi yina ba pesaka kibaka samu na kutelama na manima, samu ti Ndinga yina zolaka kubwa ve. Ya kele—ya kele kivuvu ya Muklisto. Ya kele nkebolo-nzutu ya yandi—ya yandi. Ya kele kinwanunu ya yandi. Ya kele ditadi ya yandi bubu yayi, ya kele, kuvwanda na manima ya Ndinga; mukwikidi nyonso.

⁵⁹ Ntangu yayi, beno fwana ata mbala mosi ve kubasika na manima ya Yawu. Ntangu beno ke sala yawu, beno, beno ke zibula kyelo na mbeni, ntangu ba ke tuba, “Oh, mbote, beno lenda sala mwa *yayi*, mpe mwa *yina*.” Nzambi zola ti beno kukabuka na nyonso yina ba ke bokila disumu. Beno kwenda ya movimba na lweka yankaka samu na Yandi, mpe samu Yandi kaka.

60 Yandi kele na lukanu mosi na luzingu ya beno, na konso muntu, ti muntu yankaka ve na ntuala ya ntoto lenda baka kisika ya beno. Nzambi kele na kima samu na beno. Beno kele ya kusala mutindu yina. Ba salaka beno mutindu yina samu na lukanu mosi. Nzambi kele mfumu na kisalu ya Yandi. Yandi mpe . . . Bima na mutindu yankaka. Beto kele ya kuswaswana, mosi na yankaka.

61 Beto ke tala yawu na luzingu ya baniama. Beto ke tala ti, na luzingu ya niama, ya kele na niama mosi, Nzambi salaka kibulu na kizitu, mutindu mpunda, mpe—mpe yandi fwana kusala. Mpe ngombe kele munkayulu. Mpe, kasi, nkosi mpe yingo ke tambulaka na mfinda kukondwa kusala to kima mosi. Yandi salaka niama ya nene mutindu nzawu, mpe kuna salaka niama ya fyoti mutindu mpuku. Ntangu yayi, nani kele kuna samu na kutuba na Nzambi yinki ya kusala mpe mutindu ya kusala yawu? Yandi ke salaka yawu mutindu ya Yandi Mosi.

62 Mpe Yandi salaka myongo. Yandi salaka bisika ya kuyuma. Yandi salaka bamubu. Yandi salaka banseke. Yandi salaka mutindu mosi ya yinti, yinti ya ngolo, diba, mpe—mpe nyonso yankaka. Yandi salaka yawu.

63 Yandi salaka bantu mutindu na mutindu. Yandi pesaka beto, mosi na mosi, kisika ya kuswaswana. Mpe yinti ya diba lenda vwanda ata mbala mosi ve hickory. Yinti ya hickory lenda vwanda ata mbala mosi ve diba. Muntu ve lenda baka kisika ya beno, mpe beno lenda meka ve na kubaka kisika ya muntu yankaka. Samu ti, beno kele muntu, samu na Nzambi, mpe Nzambi kele na lukanu na beno. Yandi salaka beno mutindu yina. Beno ke tuba, “Samu na yinki Yandi salaka yawu?” Yandi kele mfumu. Yandi kele na kikuma samu ya vwanda mutindu yina.

Kasi beto ke mona ti beto nyonso kele ya kukeba na Ndinga.

64 Na mazulu, beto ke tala banzutu ya mazulu. Biblia ke tuba ti ata mpe mbwetete mosi kele ya kuswaswana na yankaka. Ya kele na Sirius mpe bayankaka. Mpe Mars mpe Jupiter, nyonso yina kele mutindu yankaka, ba kele ya kuswaswana mosi na yankaka. Mwini kele ya kuswaswana na ngonda, mpe ngonda na bambwetete. Mpe ya kele na Bawanzio, mutindu, ya kele na Ba-seraphin mpe Ba-cherubin, mpe Bawanzio mpe Bawanzio ya nene, na—na bitezo. Mpe dyaka na yinza ya malu-malu ke na kwiza, bantinu ya ntoto ke nata lukumu ya bawu na mbanza.

65 Beto ke vwanda ntangu nyonso mutindu yina. Samu ti, Nzambi kele ve bibuti ya nene Sears and Roebuck Harmony House. Yandi kele Nzambi na mutindu ya kuswaswana. Yandi salaka mutindu mosi, mpe mosi mutindu yankaka. Kasi beto fwana sadila Yandi na mutindu yina Nzambi salaka beto, mpe kuvwanda na kyese, mpe kuvwanda na manima ya Ndinga ya Yandi. Mpe ya kele mutindu Nzambi salaka yawu.

66 Kasi ntangu beto ke tala ti mbeni sabukaka Ndinga yina, na yayi, ksalu ya Nzambi, yandi bebisaka yawu. Mpe ya kele ya kieleka yina yandi ke na kusalaka ntangu yayi. Yandi ke na kusyelumuka na malembe na ksalu yina, mbeni, ke na kumeka na kukumisa beto Kimvuka ya Yinza ya Mabuundu. Mpe muntu kele. . . Mbote, muntu ke lenda wisana ve mosi na yankaka, wapi mutindu beto ke sala yinza ya muvimba na kuwisana na muntu? Mpe na ntangu beno ke sala yawu. . .

67 Beto kele na Mosi na yina beto fwana vwanda na kiwisa, ya kele Nzambi. “Mpe na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.” Mpe Ndinga kele kaka Nzambi, mpe ntangu nyonso ke vwanda Nzambi, samu ti Nzambi kele na kati ya Ndinga. “Mpe Ndinga kumaka nsuni mpe zingaka na kati-kati ya beto,” na kati ya Muntu ya Mwana ya Nzambi.

68 Ntangu yayi beto ke mona, ti, na manima Yandi me tala kubeba ya nene yayi, talanaka mutindu, ya vwandaka beno na munu, mpe beto zolaka tula ntangu nyonso yina mpe ngolo, beto zolaka losa kima yina kuna mpe kubika yawu kukwenda, kasi, Nzambi ve, Yandi vwanda zola ve kubika ksalu ya Yandi kukwenda na kubeba. Ya kele luzolo ya Nzambi. Kukondwa ntembe ti powete kutubaka:

Ti beto fulusa mubu na tinta,
Mpe ti mazulu kele buku;
Mpe konso mwinga na zulu ya ntoto disala,
Mpe ti konso muntu musoniki;
Kusonika zola ya Nzambi
Ke yumisa mubu;
To buku ke lunga nyonso ve,
Ata yinda ya zulu na zulu.

69 Beno mona zola ya Nzambi! Na manima muntu kubwaka mpe zibulaka na luzolo ya yandi mosi kyelo na mbeni, mpe kwizaka mpe bebisaka yandi, mpe tulaka lufwa na kati ya yandi, dyaka Nzambi zolaka ve ti yayi kuvwanda ya kununga. Yandi kulumukaka mpe bandaka dyaka. Yandi zolaka dyaka kusala muntu yina.

70 Yandi tulaka Adam na ngwisani mosi, “Sala *yayi*, mpe *yayi* ve; *yayi*, mpe *yina* ve; kusimba ve, kusadila ve, kumeka ve.”

71 Kasi beto ke mona ti, ntangu Yandi bandaka dyaka, Yandi bandaka na—na Abraham. Mpe na Abraham, Yandi bandaka na yandi na ngwisani ya kukondwa musiku. Ve “kana nge zola.” “Mu me. Mu me sala yawu yimeni. Mu sakumunaka nge, nge na nkuna ya nge, mpe nyonso yina, na manima ya nge.” Ya vwandaka ngwisani ya kukondwa musiku. Yandi bandaka na Abraham, ksalu ya Yandi dyaka, mpe ntangu yayi na ngwisani ya Yandi ya kukondwa musiku. Na yina, ntangu beto ke

mona, Yandi bandaka na Abraham mpe pesaka yandi ngwisani, kukondwa kima mosi, na nsilulu.

⁷² Na manima Yandi kumaka na bakuluntu, beto ke kwiza na manima, na Ngwisani ya Ntama, na yina beto ke kulumuka. Awa Yandi me lakisa lufulu ya kisalu ya Yandi. Ntangu yayi beto kele na Abraham, Isaac, Jacob, Joseph; bakuluntu yiya.

⁷³ Ntangu yayi, Abraham vwandaka talisa kisalu lukwikilu, lukwikilu, samu ti Abraham vwandaka lukwikilu. Yandi vwandaka na lukwikilu ya nene, samu, “Yandi tulaka ntembe ve na nsilulu ya Nzambi, na nzila ya kukondwa lukwikilu.” Ntangu, beto ke tuba, “bima vwandaka simba ve,” mpe nyonso teleminaka yandi, yandi kangamaka dyaka na Nzambi.

⁷⁴ Na manima beto kele na Isaac, yina vwandaka mwana ya luzolo, yina vwandaka lakisa zola, samu ti, Abraham na kuvwandaka kifwanusu ya Nzambi, mutindu Isaac kupesamaka, na Genèse 22, beto ke mona ti yandi nataka bankuni na mongo, mpe nyonso vwandaka fwanikisa Klisto, vwandaka lakisa na ntwala Yandi. Mpe kuna nkombo kwizaka mpe kupesamaka na munkayulu na kisika ya yandi.

Ntangu yayi yina vwandaka lukwikilu, zola.

⁷⁵ Mpe *Jacob*, yina zola kutuba “muyingisi,” mpe ya kele muntu ya luvunu. Mpe beto ke bakula ti luzingu ya Jacob vwandaka talisa ya kieleka lemvo, samu ti ya vwandaka lemvo ya Nzambi, ntangu nyonso, na Jacob.

⁷⁶ Na manima ke kwiza Joseph. Ya kele ve na kima ya kutelemina Joseph. Yandi vwandaka mosi ya kulunga. Profete ya Nzambi yina kwizaka na kati-kati ya bampangi ya yandi. Mpe yina ba yinaka, kukondwa dyambu, mpe ba tekaka yandi. Mpe na mutindu nyonso, luzingu ya yandi vwandaka lakisa na ntwala luzingu ya Yesu Klisto. “Yandi kwizaka na baya Yandi, baya Yandi kuyambaka Yandi ve.” Mutindu ba yinaka Joseph na bampangi ya yandi, ba losaka yandi na dibulu, na kubanza ti kufwaka; ba basisaka, ba zangulaka na diboko ya kibakala ya Pharaon. Mpe ntangu yandi vwandaka bika kiti ya kimfumu, ba vwanda bula mpungi, beto zaba, konso dibolongo zolaka fukama, mpe na Joseph.

⁷⁷ Beto ke mona ti Yesu kutekamaka na kutala na ntalu mosi yina Joseph vwandaka. Ba basisaka Yandi na—na dibulu; mpe ba nataka Yandi na Mazulu; me vwanda na diboko ya kibakala ya Nzambi. Mpe ntangu Yandi ke katuka Kisika yina, “Mpungi ke wakana, mpe konso dibolongo ke fukama, mpe konso ndinga ke ndima Yandi,” kulunga.

Yina vwandaka lukwikilu, zola, lemvo, mpe kulunga.

⁷⁸ Kuna nzutu kisalu me kwiza, ya kifikulu ya nene yayi. Yandi salaka nzutu kusala na nzila ya baprofete. Baprofete vwandaka nzutu kisalu.

⁷⁹ Na yina na nsuka kwizaka yintu ya nzutu yayi ya nene, yina vwandaka Klisto Yandi mosi. Baprofete nyonso tubilaka na ntwala na Yandi. Kisalu nyonso ya lufulu tubilaka na ntwala na Yandi. Nzila nyonso kubanda nsaba ya Eden, kubanda na ntangu kaka yina Yandi bandaka, “Mu ke tula kuyina na kati-kati ya nkuna ya nge na nkuna ya nyoka.” Mpe beto ke mona ti Yandi bandaka kuna, mpe lutilaka na nzila ya bakuluntu na kati ya baprofete, mpe basikaka kuna. Mbala mosi dyaka Yandi monaka kifwani ya Yandi mosi, ntangu muntu mosi vwandaka butuka na zulu ya ntoto, na kivumu ya kento, yina vwandaka Kisalu ya kulunga ya Nzambi. Ya vwandaka Mwana ya Nzambi, Yesu Klisto. Kikuma Yandi vwandaka, kele samu ti Yandi vwandaka ya kulunga Ndinga.

⁸⁰ “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto.”

⁸¹ Ntangu yayi beto ke mona kutalana na Yandi kisalu ya kulunga yina me lunga. Yandi vwandaka ya kulunga mingi, mutindu Nzambi, tii Yandi tubaka, “Kana Mu ke sala ve bisalu ya Tata ya Munu, beno kwikila Munu ve. Ata ti Mu . . . Beno lenda kwikila Munu ve? Beno kwikila bisalu, samu ti yawu ke pesa kimbangi ya beno, Nani Mu kele.” Mu zola yawu. Beno me mona? Yandi tubaka, “Kana beno ke kwikila Munu ve . . .”

Ba tubaka, “Nge kele Muntu, ke na kusala Nge mosi mutindu mosi na Nzambi.”

⁸² Yandi tubaka, “Kana beno lenda kwikila Munu ve, beno kwikila bisalu yina Mu ke sala. Mpe kana Mu ke sala ve bisalu ya Yandi yina fidisaka Munu, na yina beno kele ve na muswa ya kukwikila Munu.”

⁸³ Na yawu Muklisto nyonso, bubu yayi, fwana kunata kimbangi mosi yina. Kana na kati ya Ndinga yayi ya nsilulu ya Nzambi, kana baluzingu ya beto kele ya kulunga ve mpe ke kutana ya kieleka yina Ndinga tubaka, na yina beto kele ve na muswa ya kukibokila beto mosi Baklisto kana beto kele ya kubutuka dyaka ve. Yesu tubaka, na Marc 16, “Bidimbu yayi *ke* landa bayina ke kwikila.” Beno me mona? Ve “bawu lendaka; bawu zolaka; na kutala bawu lenda.” Bawu ke sala yawu. Ya kele yina Kisadi-biteki salaka beto. Ya kele Dibuundu yina ba me zenga. Ya kele—ya kele Nzutu ya Klisto.

⁸⁴ Ntangu yayi beto ke mona ti ya talisaka Yandi na mutindu ya kulunga. Kisadi-biteki ntangu yayi vwandaka na Ndinga talisaka Kisalu ya kulunga dyaka, yina vwandaka ya kubokila Mwana ya Yandi, Nzambi, Emmanuel. Beno banza kaka, ti, muntu yina pesamaka ya muvimba tii Nzambi talisamaka Yandi mosi na kati ya nzutu yina, mpe Yandi kumaka . . . Yandi mpe Nzambi kumaka mosi. “Munu mpe Tata ya Munu kele Mosi.

Tata ya Munu ke zingaka na kati ya Munu. Mu ke salaka ntangu nyonso yina ke sepelisaka Tata.”

⁸⁵ Wapi kana Muklisto bubu yayi lendaka kuzwa kimbangi mutindu yina? Beno ke vwanda kaka kisalu ya kulunga awa na Yuma, na bala-bala. Kana beno kele kento yina ke sukulaka bilele kuna na manima ya ndonga ya nene ya kusukula bilele, beno ke vwanda dyaka kisalu ya kulunga ya Nzambi, ntangu beno lenda tuba, “Mu ke salaka ntangu nyonso yina ke sepelisaka Nzambi,” mpe yinza ya muvimba lenda mona kisalu ya Yesu Klisto kutalana na kati ya beno.

⁸⁶ Ba ke tuba, na ntangu mosi, na wolo ya ntama, ntete ba kuzwaka ofulno. . . . Ba vwanda bakaka wolo mpe vwanda bulaka yawu, muntu vwanda bulaka zolaka, ba-Indien na bilumbu ya ntete na ntangu Arizona vwandaka na buntwenya ya yawu. Bawu vwanda bulaka wolo tii muntu vwandaka bula monaka kutalana ya yandi mosi na wolo. Bawu vwandaka bula, na kubasisa na yawu, pyrite ya kisengo, poto-poto, mvindu, tii muntu vwandaka bula kumona kutalana ya yandi mosi mutindu kitala-tala, kubasika na kubulaka.

⁸⁷ Ntangu yayi, ya kele yina Nsangu ya mbote ke salaka. Bantu mingi ke zolaka ve ti ba balula mpe ba bula bawu na kubasika. Mbote, yina dibuundu kele na yawu nsatu na nkokila yayi kele mutindu mosi ya mbote, ya mutindu ya ntama, ya Mpeve-Santu ke bula na kubasisa, na yinza mpe na bima ya yinza. Ya kele yina Pentecote kele na yawu nsatu na nkokila yayi. Ya kele yina bamovema ya beto kele na yawu nsatu na nkokila yayi, ya kele kima ya mbote, ya ntama, yina ba ke bula na kupesa wolo, tii yinza ya muvimba ke basika na beto, mpe Yesu Klisto ke talana.

⁸⁸ Bika mu kuzwa ndambu ya bantu yayi awa na nkokila yayi, ke tala ya muvimba na Klisto, mpe baluzingu ya bawu ya kupesa na Klisto. Mu lenda sala mingi na ndambu yayi, to Nzambi lenda sala mingi, na kisika, na ndambu ya bantu yayi awa, kulutila na yina beno lenda sala na Kimvuka ya Yinza ya Mabuundu, na ntwala ya Kimfumu ya Nzambi. Muntu mosi yina ke kupesama na maboko ya Yandi ya muvimba, ya kele kaka yina Nzambi kele na nsatu.

⁸⁹ Kasi, beno me mona, beto ke zola kaka kuvwanda ve swi mpe kubika Yandi kubula lweka *yayi*, lweka *yina*, kukatula *yayi*, kukatula *yina*, kubasisa dibanza *yayi*, mpe *yina*, mpe kubika Yesu Klisto kutalana na kati ya beto. Beto ke monaka bafilme mingi. Beto ke talaka mingi televisyo. Beto kele na kusakana mingi yankaka ya yinza, tii dibuundu me zimbisa ntomo ya yawu na bantu. Ya kele samu ti Mpeve-Santu me basika, mpe kima yankaka me kota na kati. Ya kele kieleka, bankundi.

⁹⁰ Mu kuwaka bimbangi, ya ba-Pentecotiste ya ntama, mutindu bawu vwanda kuzwa balukutakanu ya bisambu mpimpa ya muvimba. Batata ya beto mpe bamama ya beto, bamvula

makumi yiya, makumi tanu me luta, vwanda sambila mpimpa ya muvimba. Bantu vwandaka yina bawu, na bala-bala. Mpe beto ke banza, bubu yayi, kana muntu nyonso kunyonguta beto ve na dipeka, mbote, ya kele na kima mosi ya yimbi na beto. “Kyadi na beno ntangu bantu nyonso ke zonza mbote ya beno.” Ba yinaka Yandi mpe ba mangaka Yandi na bantu, mpe beto kele kifwani ya Yandi. Amen.

⁹¹ Yina beto kele na yawu nsatu bubu yayi kele balukutakanu mosi ya bisambu ya kieleka, ya kieleka, na nkusunu mosi, ya muvimba kubanda na chaire tii na mukengi, yinzo ya muvimba ya kutsyemisa na Nzambi, ti ba bula, samu na kotalisa Kifwanisu ya Muntu ke na kubula, Nsangu ya mbote kulongama na ngolo ya mvumbukulu ya Klisto. Ya kele kieleka.

⁹² Mwa nsangu yayi ya mbote ya bumuntu yina beto kele na yawu, mpe ke nyonguta muntu *yayi* na zulu ya dipeka, mpe ke sala muntu *yayi* diacre, mpe muntu *yina* nganga-Nzambi, to kima mosi yankaka ya mutindu yina, ya kele politiki. Ya kieleka ya vwandaka ve yina salamaka na Nicée, na Rome? Beto zola kubasika na bima ya mutindu yina. Ba-Methodiste, ba-Baptiste, ba-Presbyterien, ba-Pentecotiste, mpe nyonso yina, beto fwana basika na yawu.

⁹³ Politiki kele na kisika ve na kati ya Dibuundu. Mpeve-Santu kele yina ke yala na zulu ya Dibuundu, mpe ve vote na mutindu ya politiki na kulandaka nani kele nani. “Nzambi tulaka na kati ya dibuundu mwa bantumwa, mwa baprofete, mpe mwa milongisi, mpe ba-évangéliste, mpe ba-pasteur.” Bantu ve zolaka bawu kuna. Nzambi tulaka bawu kuna, na mbokolo ya Mpeve-Santu, na balukutakanu ya bisambu, mpe kutentika ya maboko, mpe kuvwanda na ntwala ya Nzambi.

⁹⁴ Kasi, bubu yayi, beto me kumisa nsambulu ya beto na kisika mosi ti, yawu mosi, ti beto ke bula yawu na ba-denomination ya beto nyonso. Beto kele. . . Mosi lenda lakisa musapi ve na yankaka. Beto nyonso me kubwa. Na kati kuna beno ke tala babakala mosi ya kieleka mpe bakento ya kieleka. Kasi dyambu, yina mu ke na kubanzila, beto ke na kukuma mingi ndambu na—na lweka ya lutangu ya fyoti, bantu ya kieleka yina zola kukwikila mpe yina ke na nsatu ya ngolo ya Nzambi. Ya kele na bantu mingi ba me kotisa kaka na nzila ya nkadulu ya kimuntu, “Mbote, *yayi* kele muntu ya mbote. Yandi kele muntu ya mbote.”

⁹⁵ Beto kele na mabuundu ya mbote. Beto me tunga mabuundu ya mbote, mpe mabuudnu ya kulutila mbote na yina beto vwandaka na yawu. Ya kele kieleka mbote. Ya kele na kima mosi ve ya yimbi na yawu. Mu ke zolaka kumona dibuundu kukwenda na ntwala.

⁹⁶ Kasi, bampangi, mu ke zola mingi kumona yawu kukwenda na ntwala na ngolo ya Mfumu kulutila ya kukwenda na ntwala na bima ya yinza. Beno vutuka dyaka na Nsangu ya mbote!

Beno vutuka na ngolo ya Nzambi! Beno vutuka na pentecote, . . . mutindu ya ntete vwandaka. Kasi, beno me mona, dyambu ya yawu kele, ti beto zola ve kuzwa kubula yina ve.

⁹⁷ Beno lenda tuba kima na yina me tadila kima mosi, mpe kima mosi ya kukondwa bumuntu dibuundu ke na kusalaka, to—to kima mosi samu na bantu, kaka na yina ba ke manga beno, ke kanga myelo. Beno lenda kota ve, beno me mona, samu ti bawu kele na lukutakanu mpe ba ke bika beno na nganda. Bawu ke zola dyaka beno ve. Bawu ke tuba, “Nge me lawuka. Nge me zimbisa mabanza ya nge.” Kasi kana ya kele MUTINDU ME TUBA MFUMU, yina ke dyambu ve na munu yina muntu yankaka ke tuba. Ya ke lomba ngolo ya Klisto samu na kusoba muntu. Ya ke lomba ngolo ya Klisto na kukeba muntu.

⁹⁸ Mpe mutindu Yesu tubaka kilumbu mosi, “Beno tala ba-lis. Mpe kasi mu ke tuba na beno ti Salomon, na nkembo ya yandi nyonso, vwandaka ve ya kulwataka ve mutindu mosi.” Salomon, na nkembo ya yandi nyonso, vwandaka monisa kitoko mingi. Ya kele kukondwa ntembe. Yandi vwandaka kima ya nene samu na yinza, mpe muntu ya nene na ntwala ya Nzambi. Kasi robe ya Salomon vwandaka ve na luzingu na kati ya yawu. Ya vwandaka kitini ya lele, mu banza ba katulaka na mukongo ya dimeme. Kasi, lis vwandaka na luzingu.

⁹⁹ Yina beto kele na yawu nsatu bubu yayi kele Luzingu ya Klisto na kati ya beto. Ya kele yina ke vedisaka; nganda ve, nkingu ya kubaluka, to diplome ya psychologie, to kima mosi. Ya ke lomba ngolo ya mvumbukulu ya Klisto samu na kusala beto yina beto fwana vwanda. Nzambi kele na dikani yankaka ve ti Mpeve-Santu kutwadisa mpe kuyala na kati ya Dibuundu.

¹⁰⁰ Oh, Nzambi, Yandi vwandaka nene mingi na kifwanisu ya Nzambi, tii Yandi na Nzambi kumaka Mosi. “Munu na Tata ya Munu kele Mosi.” Oh, la la! Wapi luzingu ya vwandaka, samu Nzambi kuzinga mingi na Yandi, ti luzingu ya Yandi ya muvimba vwandaka ya kufuka na Nzambi. Kukondwa ntembe ti Yandi vwandaka kosalu ya kulunga!

Satana kwizaka na Yandi.

¹⁰¹ Ntangu nyonso Nzambi banzaka ti Yandi kuzwaka kosalu ya kulunga, Satana ke kwiza. Yandi kwizaka na Moise, mpe yandi bukaka misiku. Kasi na ntangu yandi kwizaka na Kisalu ya kulunga yayi, yina vwandaka nsodolo ya Nzambi Yandi mosi. Amen. Yandi—Yandi soolaka Yandi na ntwala. Ya salaka yandi ata mbote ve. Yandi vwandaka ya kukwikama na Nzambi, ntangu Nzambi talaka Yandi mpe monaka ti ba mekaka Yandi bilumbu makumi yiya na ntoto ya kuyuma, mutindu Moise. Samu ti, bantu nyonso yina lakisaka na ntwala Yandi. Musiku kubukanaka. Kasi ntangu yandi kwizaka, Satana, mutonta ya nene, mpe mekaka na kumeka Yandi, yandi bakulaka ti yandi talaka Moise kuna ve. Ve, tata. Yandi simbaka mafunda tanu

ya bavoite ya watt yina yokaka mapapu ya yandi ntangu yandi dumukaka na Muntu yina.

¹⁰² “Ya kele ya kusonama,” Yandi tubaka. Beno me mona? Adam kubwaka. Kasi, Yesu, Adam ya zole, Kisalu ya kulunga yina kwizaka, samu na Mukudi, Yandi tubaka, “Ya kele ya kusonama, ‘Muntu ke zinga kaka na dimpa ve, kasi na konso Ndinga yina ke basika na yinwa ya Nzambi.’” Kuna Yandi vwandaka Kisalu ya kulunga. Yinga, tata. Yandi tubaka kima yankaka. Yandi tubaka, “Ya kele mpe ya kusonama, ‘Nge ke meka ve Mfumu Nzambi ya nge.’ Katuka awa, Satana.” Ya vwandaka Kisalu ya kulunga. Yinki Yandi salaka?

¹⁰³ Yandi tubaka ve, “Mu ke tuba na dibuundu ya munu. Mu ke sala banganga-Nzambi kusala *yayi-mpe-yayi*. Bishop ke sala *yayi-mpe-yayi*.”

¹⁰⁴ Yandi tubaka, “Ya kele ya kusonama.” Ya kele na yina Yandi tulaka Adam ya Yandi ya ntete na manima, mpe yandi kubwaka, mpe Satana bebisaka yandi. Kasi yandi lendaka ve kubebisa Yandi yayi, ata nyonso yina yandi salaka. Na mutindu nyonso, tii yandi . . .

¹⁰⁵ Nzambi tubaka, “Yayi kele Mwana ya Munu ya luzolo. Beno kuwa Yandi. Bima nyonso, mu me pesa bima nyonso na Yandi. Beno, beno kuwa Yandi.” Bawu vwandaka Mosi. Bawu vwandaka Muntu mosi. Nzambi zingaka na kati ya Yandi, salaka Yandi Nzambi, Emmanuel, na zulu ya ntoto. Yandi vwandaka Mwana-dimeme ya kulunga, oh, Kisalu ya kulunga yina me lunga ya mpulusu. Yawu sepelisaka Nzambi, na yina, kaka mutindu Michel-Ange, Yandi vwandaka mingi ya kutwadisa na kimpeve na luzingwa ya Yandi. Beto ke mona na . . .

¹⁰⁶ Mu kele na Masonuku ya kusonika awa. Marc 9:7, kana beno zola kutanga yawu. Ntangu . . . Ya kele Mongo ya Nsobolo. Ntangu Yandi vwandaka kuna na zulu ya Mongo ya Nsobolo, beto ke tala ti Moïse monikaka, mpe kuna monikaka Elie.

¹⁰⁷ Mpe kuna, kima ya ntete beno zaba, ntumwa Pierre twadisamaka mingi na kimpeve, ti yandi tubaka, “Beto tunga batabernacle tatu awa. Beto ke sala kaka ba-organisation tatu na yayi. Beto ke sala ba-denomination tatu: mosi samu na Moïse, mosi samu na Elie, mpe mosi samu na Nge.”

¹⁰⁸ Na yina yandi vwandaka zonza, kuna basikaka ndinga na dituti. Yawu tubaka, “Yayi kele Mwana ya Munu ya luzolo. Mu me sepela mingi na Yandi, mu ke bula Yandi samu na beno. Beno kuwa Yandi. Yandi ke zonza.”

¹⁰⁹ “Yandi lwalaka samu na masumu ya beto. Yandi nikamaka samu na masumu ya beto ya nko.” Yandi vwandaka Mwana-dimeme, Mwana-dimeme ya Nzambi, Munkayulu ya kulunga. Ata mbala mosi ve ti muntu zingaka mutindu Yandi, ata mbala mosi ve ti muntu zingaka mutindu Yandi tuka. Yandi vwandaka

Kisalu ya kulunga yina me lunga, fwananaka ya kieleka na Ndinga ya Nzambi.

110 Nzambi na mbandukulu pesaka Ndinga ya Yandi, ndambu samu na kitini *yayi* ya ntangu, samu na kitini *yina*, samu na kitini *yina*.

111 Ya kele kisika bantu ke vunama mingi mpe kele na kati ya mubulu bubu yayi. Ba ke na kumekaka na kutunga na zulu ya kima yina kusalamaka bamvula makumi yiya, makumi tanu me luta. Beto kele. . . Ti, yina ba pesaka samu na nsungi yina.

112 Wapi mbote ya zolaka sala na Moise na kukwiza na—na nsangu ya Enoch? Wapi mbote ya zolaka sala na Moise na kukwiza na—na nsangu ya Noé? Wapi mbote ya zolaka sala Yesu na kukwiza na—na nsangu ya Moise? Beno me mona? Mpe wapi mbote ya zolaka sala Wesley na kukwiza na nsangu ya Luther? Wapi mbote ya zolaka sala Pentecote na kukwiza na nsangu ya Wesley? Beno me mona yina mu zola tuba?

113 Nyonso ke tala awa na kati ya Biblia, mpe beto fwana zaba nsungi mpe ngunga, mpe yina kele samu na beto. Mpe ya kele kisika beto ke na kubwa bubu yayi. Beto ke na kutangaka nyonso yankaka kasi Biblia ve. Yayi kele kilumbu yina beto fwana zingila. Yayi kele kilumbu yina Nzambi me tula beto awa. Beto tala na Ndinga.

114 Ya kele mutindu bawu kondwaka na kumona Yesu; ba-Pharisien yina, ba-Sadducéen, mpe ba-Hérodien. Ba-organisation ya mutindu na mutindu ya kilumbu yina ba kubikaka yawu mbote, mpe kieleka kubikaka yawu na mutindu ya kulunga, ti ya vwandaka ve na nzila ti bawu ke kondwa yawu, bawu banzaka. Kasi ntangu Yandi kwizaka, ya kieleka Yandi. . . Yandi vwandaka ya kuswaswana na nyonso yina bawu banzaka na nyonso. Yandi vwandaka Muntu mosi ya fyoti, ya kulemvuka yina butamaka na kidikilu, na. . .zolaka vwanda Mwana ya makangu, mpe bima nyonso yayi mutindu yina.

115 Kasi, dyaka, Yandi kwizaka ya kieleka mutindu Masonuku tubaka ti Yandi ke kwiza. Mpe bawu mesanaka na yina Moise tubaka, mpe Moise zonzilaka na Yandi. Yandi tubaka, “Mbote, kana beno zabaka Moise, beno zolaka zaba Munu. Moise zonzilaka na Munu.” Mpe dyaka bawu lendaka ve na kumona yawu. Bawu vwandaka kaka mingi ya kukota na binkulu ya bawu, ti bawu lendaka ve na kumona yawu. Kasi, beno me mona, Yandi kwizaka ve na kotalisa ba-organisation ya bawu ya kilumbu yina. Yandi kwizaka ve na kotalisa nsambulu ya binzambi-nzambi.

116 Yandi kwizaka na kotalisa Tata, mpe Tata vwandaka Ndinga. Amen. Ntangu yayi mu ke kumitala musambidi ya kieleka. Yandi kwizaka na kotalisa Ndinga ya Tata. Nzambi tubaka ti Yandi ke vwanda kuna, mpe Yandi vwandaka kuna, Kisalu ya kulunga yina me lunga ya kisalu ya nene ya Nzambi.

Oh, la la! Yandi vwandaka kutalana ya kulunga ya Yandi. Yandi talisaka nyonso yina—yina Nzambi zonzilaka. Yandi talisaka yina Adam tubaka na zulu ya Yandi. Yandi talisaka nyonso yina baprofete tubilaka, nyonso yina bakuluntu tubilaka. Nyonso yina Yandi tubaka, Yandi vwandaka kulungisama ya Ndinga. Bifwanukusu nyonso kulungamaka na kati ya Yandi. Yinga. Yandi kumaka Yehowa ya Ngwisani ya Malu-malu. Yandi vwandaka Yehowa ya Ngwisani ya Ntama. “Ndinga kuna,” yina vwandaka na kati ya Dikunzi ya Tiya, “me monisama mpe me zinga na kati-kati ya beto.” Yehowa ya Ngwisani ya Ntama kumaka Yesu ya Ngwisani ya Malu-malu. Yandi vwandaka kutalana ya kulunga ya Nzambi.

117 Oh, kana Dibuundu bubu yayi lendaka talisa kaka Dibuundu yina ya ntete, ntangu Mpeve-Santu kulumukaka na Kilumbu ya Pentecote! Kana Muklisto bubu yayi lendaka kutalisa! Beto kele nkonga ya bima ba me vukisa, na yina bawu vwandaka.

118 Mu lutaka, na kukwizaka bubu yayi, Mu vwanda tala mbote, na kukulumukaka awa, na mosi ya mwa ba-Casa Grande yayi, to na mwa bisika yayi ya fyoti awa, mu talaka ya vwandaka na bilanga ya koto, mpe mutindu na mutindu ya luzerne. Ba zolaka kuzwa bamasini ya mupepe kuna, samu na kupompa maza, samu na kukeba yawu. Samu na yinki? Ya kele ve na kisika ya yawu kuna. Ya kieleka ve. Kasi, beno tala ba-cactus ya ntama yayi, ya lendaka salama ti mvula noka ve bamvula tanu mpe ya ke zinga. Mpe kana beno kondwa kulosa yawu maza mwa bilumbu, mpe ya ke kufwa. Beno me mona, ya kele ve ya ntete.

119 Ya kele mutindu beto kele. Ba fwana bomba beto, mpe kusala beto bantu ya nene na dibuundu, mpe kunyonguta beto, kubokila beto *yayi, yina*, to kima *yankaka*.

120 Na yina, Baklisto ya ntete yayi vwandaka na ngolo. Bawu vwanda kipe ve nani vwandaka nyonguta bawu na manima. Bawu vwandaka talisa Yesu Klisto, mingi, ti bawu tubaka. . . Ba talaka bawu—bawu vwandaka bantu yina zabaka kima mosi ve mpe yina longokaka ve. Bantu kwendaka ve na lukolo ya nene, mpe ti bawu kuzwaka ve diplome ya lukolo ya nene. “Kasi ba bakulaka ti bawu vwandaka na Yesu.” Ya kele yina bawu ke na yawu nsatu, Baklisto bubu yayi, ti ba bakula ti beno vwandaka na Yesu. Ti ya kele na kima na beno, yina kele mutindu yankaka. Mu zaba ti ya kele ve. . . Ya kele kima ya kuzabana ve na kutuba, kasi beto ke na kusosaka ve na kuzabana. Baklisto ke na kusosa ve kima ya pete.

121 Mpangi mosi ya kento ya kiboba na dibuundu ya munu bamvula me luta, vwanda telamaka mpe ke yimba nkunga:

Ba fwana nata munu na Mazulu
Na zulu ya mbeto ya mbote ya bafelele,

Na yina bayankaka nwanaka samu na
kununga ntalu
Mpe zabukaka na banzadi ya menga?

Ve, mu fwana nwana kana mu fwana yala.

¹²² Beno ke banza yina beno ke sala kana beno vwandaka awa mpe nyonso teleminaka Yesu Klisto, kana beno zingaka na bilumbu ya Yandi. Beno ke na kuzinga kuna, mpangi ya munu ya bakala, mpangi ya munu ya kento. Ya kele kieleka. Yandi kele dyaka Ndinga. Beno tala mutindu ba ke dyata Yawu bubu yayi. Beno tala mutindu bawu ke na kumekaka na kusala organisation na Yawu, mpe kuvukisa Yawu, mpe nyonso mutindu yina, na yinza. Beno telema ngwi. Beno baka—beno baka sika ya beno samu na Yesu Klisto na Ndinga ya Yandi. Beno bika kima mosi ve kukanga nzila na yawu. Beno kangama kaka na Yawu.

¹²³ Mutindu bantu ya ntama ya ba-Chinois na pressing, vwanda kwizaka awa na Arizona mpe na Californie, bamvula me luta. Bawu vwandaka lenda ve kusonika mpova mosi na Kingelesi. Na mpasi bawu zabaka yawu. Kana beno nata bilele ya beno na bawu. Beno zaba yina bawu ke sala? Bawu vwandaka na mwa kitini ya mukanda, kima mosi ve ya sonika na zulu ya yawu. Yandi ke pasula kaka kitini ya mukanda yina mpe ke pesa beno kitini mosi. Ntangu beno ke vutuka, kitini yina ya mukanda zolaka vukana na kitini ya mukanda ya yandi, to beno ke baka ve bilele ya beno. Ya kele mbote mingi kulutila. Beno lenda kopiye nkumbu mosi, kasi beno lenda sakana na yandi ve kuna, samu ti kitini ya mukanda yina fwana kuvukana kaka na kitini ya yandi ya mukanda.

¹²⁴ Ya kele mutindu Nzambi salaka ngwisani ya Yandi mpe. Nzingulu ya beto fwana vukana ve na credo mosi, na dogme mosi, na denomination ya dibuundu mosi, kasi ya fwana vukana na Ndinga ya Nzambi, Yesu Klisto. Kieleka. Ntangu beto ke kwiza na Klisto, na yina Klisto ke bokila beto. Yandi bukaka Yandi na bitini zole, na Calvaire. Ndambu ya yawu Yandi zangulaka yawu, mpe samu na kuvwandisa na diboko ya Yandi ya kibakala, yina vwandaka nzutu. Mpeve, Yandi kwizaka, fidisaka awa samu na kusala Kento ya makwela samu na Yandi. Mpe nzingulu mosi yina vwandaka na kati ya Klisto fwana vwanda na kati ya beto.

¹²⁵ Yandi vwandaka—Yandi vwandaka ya kieleka ya kulunga mingi ti Yandi sepelisaka Kisadi-biteki, mpe twadisaka Yandi mingi na kimpeve ti Yandi bulaka Yandi na Calvaire. Oh, la la! Ntangu yayi beto ke mona Yandi mutindu Masonuku me tuba, kisalu ya kulunga ya Nzambi. “Beto ke mona ti ba bulaka, ba lwalisaka, mpe ba talisaka Yandi mpasi na Nzambi.” Beno tala kisalu ya kulunga ya kieleka. Mutindu Ange bulaka ya yandi, ya kele yina salaka . . .

¹²⁶ Kana Yandi zingaka kaka luzingu ya mbote, Yandi zolaka vwanda mutindu bantu yankaka yina ke longaka nsangu ya

mbote ya bantu bubu yayi, “Yandi vwandaka profete.” Yandi vwandaka profete, kasi Yandi vwandaka kulutila profete. Yandi vwandaka Nzambi. Yandi vwandaka Emmanuel.

¹²⁷ Mpe ntangu yayi yina Yandi salaka ya kieleka, samu na munu, Kisalu ya kulunga samu na munu mpe na beno, ya kele samu ti Nzambi bulaka Yandi. Yandi bulaka Yandi na Calvaire. Kana ba bulaka Yandi ve... Ata bantu yikwa ya kufwa Yandi vumbulaka, mutindu nene Yandi longaka, mutindu nene luzingu ya Yandi vwandaka, mutindu kutuba ya Yandi vwandaka, ba siamisaka Yandi kuna. Yandi sepelaka mingi, Nzambi vwandaka, tii Yandi vwandaka Muntu yina kaka telamaka na ntwa ya ntoto ti Nzambi zolaka bula samu na bantu yankaka. Muntu ya kulunga yina kubulamaka samu na bantu ya kulunga ve. Luvangulu nyonso yina kubwaka, na nzila ya Adam, ya kulamaka na nzila ya Yesu Klisto. Kisalu ya kulunga ya Nzambi telamaka na mumekanu. Wapi mutindu Yandi salaka yawu? Na nzila ya Ndinga. “Ya kele ya kusonama, ‘Muntu ke zinga kaka na dimpa ve, kasi na konso Ndinga yina ke basika na yinwa ya Nzambi.’”

¹²⁸ Oh, nkundi ya Muklisto, beno lwata binwaninu nyonso ya Nzambi. Beno vwanda ve na manima na mwa dibanza mosi ya credo mosi, to kima yina beno ke simbidila. Beno lwata binwaninu nyonso ya Nzambi na ntangu beno ke kwenda nwanisa mbeni, mutindu Mfumu ya beto salaka. Yandi lakisaka yawu mutindu Muklisto ya kulutila kulemba lenda nunga Satana kaka na Ndinga. Yandi vwandaka na bangolo, Yandi zolaka bula Satana kisika nyonso Yandi zolaka, kasi Yandi sadilaka yawu ve. Yandi bakaka kaka Ndinga mpe nungaka yandi na Yawu. “Ya kele ya kusonama. Ya kele ya kusonama.” Bisika nyonso, “Ya kele ya kusonama.” Na yawu Yandi nungaka Satana na nzila ya Ndinga ya Nzambi.

¹²⁹ Ntangu yayi, yina vwandaka Kisalu ya kulunga yina me lunga mpe Nzambi bulaka Yawu. Wapi kifwani Yawu vwandaka! Wapi dyambu ya kieleka! Beno ke zonzila na kitini ya—ya kifikulu ya Michel-Ange kuna, ya Moise yina ba bulaka na dikulu? Biblia ke tuba, “Muntu yayi kubebaka kulutila bantu nyonso. Yandi bebaka mingi ti Yandi talanaka dyaka ve mutindu mwana ya muntu. Ba bulaka Yandi. Ba nikaka Yandi. Yandi vwandaka ya kifuluka na menga. Ba bulaka Yandi fimbu.” Yandi . . . Nyonso yina ba zolaka sala. Yandi vwanda talana kaka mutindu kaka kikunku ya nene ya Menga mpe ya mikwa, yina vwanda tambula kintwadi. Yandi talanaka ve mutindu muntu, mutindu Yandi vwandaka nata yawu na Calvaire. Nzambi bulaka Yandi samu na beto. Ya kele yina ke sala Yandi Kisalu ya kulunga yina me lunga.

¹³⁰ Oh, mutindu mu zola Yandi, mu zaba ti Yandi salaka yawu samu na munu, mu zaba ti Yandi salaka yawu samu na beno. Wapi mutindu beto—wapi mutindu beto lendaka vukisa yawu?

Muntu mosi ve lenda vukisa yawu. Muntu ve kele ya kulunga na kuvukisa yawu. Beto vwandaka awa kukondwa kivuvu. Beto kukondwa Nzambi. Beto kukondwa nzila ya mpulusu. Mosi na mosi ya beto me butuka na nzila ya sexe, mpe beto zolaka futa kaka ntalu. Kasi Yandi kwizaka, Muntu ya kulunga, mpe vwandaka mingi ya kulunga mpe sepelisaka mingi ti Nzambi bulaka Yandi samu na beno mpe munu.

¹³¹ Ntangu yayi, samu na pene bamvula mafunda zole, Nzambi me vwanda na kumeka na kuzengila Yandi Kento ya makwela ya kisalua ya kulunga, yina ba ke bokila Dibuundu. Ya kele kieleka. Wapi mutindu Nzambi ke salaka yawu? Yandi ke salaka yawu na mutindu ya Yandi ya kukondwa-kusoba, Ndinga. Nzambi me sobaka ata mbala mosi ve mutindu ya Yandi. Muntu nyonso, beno lenda sala yawu. Beno ke sobaka. Mu ke sobaka. Ntangu ke sobaka. Yinza ke sobaka. Kasi Nzambi ke sobaka ve, Yandi kele ya kulunga. Yandi ke sobaka ve. Mpe mutindu Yandi ke sala kima na mbala ya ntete, Yandi ke sala yawu konso ntangu mutindu mosi.

¹³² Yandi vulusaka muntu kilumbu mosi samu ti yandi balulaka ntima. Ya kele dyaka mutindu yandi ke vulusa muntu. Yandi belusaka muntu mosi samu ti yandi vwandaka na lukwikilu. Yandi ke belusa muntu yankaka na zulu ya lufulu mosi. Yandi ke sobaka ata mbala mosi ve mutindu ya Yandi, samu ti, beno me mona, Yandi kele mfumu mpe Yandi kele ya Kukonda nsuka. Yandi kele ya seko, bisika nionso, zaba nionso. Yandi kele Nzambi. Mpe na yawu Yandi kele na nsatu ve ya kuyufula ndwenga na muntu nyonso. Yandi kele na nsatu ya kuingila ve tii Yandi ke longoka dyaka. Yandi kele na nsatu ya diplome ya malu-malu ve. Yandi kele ya kulunga. Mpe diplome nyonso, mpe kima nyonso Yandi salaka ntete, lukanu ya Yandi ya ntete ke vwanda mutindu mosi kukonda nsuka. Ya lendaka soba ata mbala mosi ve. Oh, mutindu mu kele na kiese!

¹³³ Mpe ntangu Yandi salaka kisalua ya kulunga ya Yandi ya ntete, Yandi tulaka yandi na manima ya Ndinga. Ntangu Yandi salaka Kisalu ya kulunga ya Yandi ya zole, Yandi vwandaka Ndinga. Amen. Yandi vwandaka Ndinga; ve *na manima* ya Ndinga. Kasi, Yandi vwandaka Ndinga. Nzambi ke sobaka dikani ya Yandi ata mbala mosi ve. Ya kele ya kieleka na yina Yandi bandaka na kusala dibuundu ya Yandi ya ntete, na Ndinga.

¹³⁴ Ntangu yayi, Nzambi, Ndinga, na mbandukulu, Yandi vwandaka na dipanda na yankaka nyonso, mpe na nyonso yankaka, na bantu nyonso yankaka. Ntangu yayi, mu zola tuba yayi ve samu na kuvwanda ya kuswaswana. Nzambi kele muntu ya nkabwani. Beno zaba yawu? Beno ke zonzila na kuvukisa? Nzambi kele muntu ya nkabwani. Ya kieleka Yandi kele. Yandi kabulaka bantu ya Yandi na yinza. Yandi kabulaka Israel, yinsi ya Yandi. Yandi ke na kumekaka na kukabula dibuundu ya Yandi

na yinza, kasi dibuundu zola kukwenda na yinza. Kasi bantu ya Yandi kele dyaka ya kukabuka, ya kukabuka na Yandi. Nani Yandi kele? Ndinga.

¹³⁵ Wapi mutindu muntu lenda vwanda na mbotika ya Mpeve-Santu, mpe ti Mpeve-Santu sonikaka Ndinga, mpe muntu kele na mbotika ya Mpeve-Santu mpe ke manga Ndinga? Wapi mutindu Mpeve-Santu na kati ya beno lenda manga Ndinga ya Yawu mosi yina talana samu na beno? Mu lenda bakula yawu ve. Ya fwana kuwisana na Ndinga. Mpe kana mpeve ya beno na kati ya beno lenda tuba ve na mosi na mosi ya bansilulu ya Nzambi “amen,” ya kele na kima ke tambula mbote ve.

¹³⁶ Mpangi Fred Sothmann to muntu mosi awa na nkokila yayi, me tanga, “Yesu Klisto kele mutindu mosi mazono, bubu yayi, mpe kukonda nsuka.” Yandi kele Ndinga. Yina, ya kieleka. Yandi kele ntangu nyonso mutindu mosi, beno me mona, mpe mpeve ya beno fwana tuba na yawu “amen.”

¹³⁷ “Oh, Yandi, na mutindu mosi Yandi kele.” Na mutindu nyonso, Yandi kele mutindu mosi mazono, bubu yayi, mpe kukonda nsuka.

¹³⁸ Ntangu yayi beto ke tala ti Nzambi bandaka na kusalila Yandi Kento ya makwela samu na Klisto. Na yawu . . . Mpe Kento ya makwela fwana talisama na Yandi mpe na kati ya Yandi, samu ti ya kele ndambu ya Yandi. Ntangu yayi, Kento ya makwela kele ndambu ya Yandi. Yandi kele ndambu ya Yandi. Ndinga ya kilumbu yina, Kento ya makwela ke kuma ndambu ya Ndinga yina, samu ti ya kele Klisto. Ntangu yayi, beno ke kwikila yawu? Beto fwana vwanda na kati ya Klisto. Na kati ya Klisto, beto fwana vwanda ya Klisto, na kati ya Klisto, ndambu ya Klisto.

¹³⁹ Yinki kele kento, ntangu yandi ke baka bakala, to bakala ke baka kento? Kento yina fwana vwanda ndambu ya yandi. Bawu kele dyaka ve zole. Bawu me kuma mosi.

¹⁴⁰ Mpe ntangu Nzambi na Klisto kumaka mosi, Bawu vwandaka Mosi. Samu ti, Nzambi vwandaka Ndinga, mpe Ndinga kumaka nsuni. Nsuni mpe Ndinga kumaka Mosi. Mpe ntangu dibuundu ke kuma Kento ya makwela ya Klisto, Yandi mpe Nsangu ya mbote ke kuma mosi.

¹⁴¹ Wapi mutindu beno lenda tuba, kuna ti, “Bilumbu ya bimangu me luta”? Wapi mutindu beno lenda tuba, kuna ti, “Yandi kele ve mutindu mosi mazono, bubu yayi, mpe kukonda nsuka”? Wapi mutindu beno lenda tuba ti, “Bima yina kele samu na ntumwa mosi to kilandi mosi, to samu na muntu mosi na kilumbu yankaka,” na yina beno kele ndambu ya Yandi?

¹⁴² Na yina ti, Yandi tubaka, “Mazulu na ntoto ke luta, kasi Ndinga ya Munu ke kondwa ata mbala mosi ve.” Wapi mutindu samu na Apocalypse 22, ntangu Yandi manisaka na kusonika Buku? Yandi tubaka, “Mu ke tuba ti kana muntu mosi ke bwela

ndinga mosi, to kukatula Ndinga mosi na Yawu, ba ke katula ndambu ya yandi na Buku ya Luzingu.”

143 Wapi mutindu beto ke kwenda na Mazulu, na yina, na kutubaka, “Mbote, mu ke kwikila *yayi*, kasi mu ke kwikila *Yina* ve”? Beno fwana vwanda Ndinga ya muvimba, samu ti beno kele ndambu ya Yandi. Ya kele mutindu Nzambi ke na kumekaka na kusala Dibuundu ya Yandi bubu yayi, ve na nzila ya credo. Mpe bawu ke na meka na ngolo na kukotisa beto na kati, bampangi. Beno lenda mona yawu kukwiza. Biso me sonama na kibaka. Ntama mingi ve tii beto ke kuma Dibuundu ya yinza. Mpe dibuundu nyonso ke vwanda ya kukwika na kukota na kati ya yawu na mbala mosi, to yandi fwana kutana mambu. Mbote, beno me kubama na kukutana yawu? Beno ke sala mbote na kusala ve yawu kaka samu ti beno banza ti ya kele kima ya kieleka.

144 Beno ke sala mbote na kuvwanda na Klisto na kati ya beno, samu ti Ndinga yina kele ya Seko, mpe Ndinga yina kele yina ke vumbula beno dyaka. Beno me kuma ndambu ya Ndinga yina. Beno me kukitalisa na Ndinga.

Bubu yayi, beno ke tuba, “Mu kele Muklisto.”

145 “Beno kele ya wapi denomination?” Mbote, yina kele na kima mosi ve ya kusala na Buklisto.

146 Ya kele mbote na kuzwa ba-denomination. Mu kele na dyambu ve na yawu. Kasi, beno mona, ti, ya kele yina bantu kele. . . Bantu mingi ke tubaka ti mu ke mwanngisaka ba-denomination, ti mu ke bulaka bawu mankofi. Mu ke salaka yawu ve. Ve, tata. Ba-denomination, ya kele nyonso mbote. Ya kele kaka mutindu bangwisani ya kisalu, to kima nyonso mutindu yina. Kasi ntangu beno ke kangama, samu ti beno ke tuba, “Mu kele Muklisto samu ti mu kele ya dibuundu *yayi-yayi*,” yina zola kutuba kima mosi ve. Beno fwana vwanda ya Klisto, mpe Klisto kele Ndinga. Mpe bambala mingi ba-denomination yina kele ntama mingi na Ndinga mutindu Esete kele na Wesete.

147 Beno fwana vwanda na Ndinga yina, samu na kuvwanda Kento ya makwela. Kana beno kele na kati ya Kento ya makwela, beno kele na kati ya Ndinga, mpe Ndinga kele na kati ya beno. Mpe Ndinga yina talisa Nzambi na nzila ya Klisto, ke talisa Nzambi mosi na nzila ya beno. Amen. *Amen* zola kutuba “ya vwanda mutindu yina.” Na yawu, ya vwanda mutindu yina. Mu ke kwikila ti ya kele Kieleka. Beno fwana kukitalisa na Yandi.

148 Ntangu yayi, kana mu zola kuvwanda Americain ya kieleka, kana mu zola kuvwanda sitwaye ya kieleka ya yinsi yayi, Mu fwana kukitalisa na yawu. Mu fwana vwanda nyonso yina ya vwandaka ntete, na mbote to na yimbi. Mu fwana vwanda nyonso yina ya kele, na mbote to na yimbi; nyonso yina ya ke vwanda, na mbote to na yimbi. Mu fwana kukitalisa na yinsi yayi, kana mu zola vwanda Americain. Ya kele kieleka? Na nkembo ya yawu

to na nsoni ya yawu, na bukimpwanza, to na kuzabana, nyonso yawu kele, mu fwana vwanda yina ke sala kufwa ya yawu ve. Mu fwana telama mutindu nzutu. Nyonso yina yandi kele, mu kele. Nyonso yina yandi vwandaka ntete, mu kele. Nyonso yina yawu ke vwanda, mu fwana vwanda ya yawu. Ya kele kieleka.

¹⁴⁹ Beno banza kaka na yawu na mwa baminuti fyoti. Na yina, samu na kuvwanda yina, mutindu Américain. . . Mu ke nata yawu na beno, samu ti beno na kieleka kumona yawu, na yina mu ke sukisa.

¹⁵⁰ Na kuvwanda Américain, mu fwana kukitalisa na bima nyonso yina yandi salaka ntete. Na yina, mu kulumukaka na Plymouth Rock, na—na bankooko. Mu vwandaka na Plymouth Rock na Bizieti. Mu vwandaka kuna na bawu. Mu nataka mpunda na Paul Revere, mpimpa mosi, samu na kukebisa yinsi yayi na mambu ya yandi ya boma. Mu zolaka vwanda, kana mu vwandaka Americain.

Beno ke tuba, “Oh, Mpangi Branham!”

¹⁵¹ Beno vingila fyoti. Biblia ke tuba, na Hébreux kapu ya 7, ti, “Levi yina kuzwaka bikunku ya kumi, futaka bikunku ya kumi, samu ti yandi vwandaka na kati ya menga ya Abraham ntangu yandi kutanaka na Melchisédek,” nkooko ya nkooko ya nkooko ya yandi ya bakala, mpe ba tulaka yawu na yandi. Ntangu mutekolo ya mutekolo ya mutekolo ya yandi ya bakala vwandaka na kati ya menga ya yandi, ntangu Abraham futaka kikunku ya kumi na Melekisedek, Nzambi vukisaka yawu. Yandi salaka yawu? Ya kele kieleka.

¹⁵² Nyonso yina yinsi yayi kele, mu kele. Ya kele kieleka. Na yawu, mu kulumukaka na Plymouth Rock. Mu nataka mpunda na Paul Revere.

¹⁵³ Mu zabukaka Valley Forge, mu vwandaka na nzadi yina ya galasi na George Washington. Mu vwandaka mosi ya basoda ya Amerika yina vwandaka ve na basapatu, ntangu bawu kwendaka telemina ba-Britannique. Mu vwandaka na madidi na makulu na suka yina, ntangu mu futikaka makulu ya munu. Mu monaka Washington kubasika na mfinda, ya kupola, tii na luketo ya yandi, na kusambilaka mpimpa ya muvimba. Mu vwandaka kuna ntangu ya salamaka.

¹⁵⁴ Mu telemaka kuna na Stonewall Jackson, na ntangu opposition vwandaka nene mingi. Ntangu basoda ya node fidisaka bantu kuna, bawu tuba, “Basoda nyonso me vutuka manima.”

Ba tuba, “Wapi kisika kele Jackson?”

¹⁵⁵ Ba tuba, “Yandi me telama mutindu kibaka ya ditadi.” Mu telamaka na yandi kuna; mwa, muntu ya fyoti, ya meso ya bleu.

¹⁵⁶ Ba yufulaka yandi kilumbu mosi, “Wapi mutindu nge ke lenda kutelema na ntangu opposition ke vwanda nene mingi?”

¹⁵⁷ Kieleka muntu ya kulemvuka, yandi bulaka na bote ya yandi, mutindu *yina*, yandi tubaka, “Mu ke kunwaka ata mbala mosi ve maza na yinwa ya munu, ti mu vutula matondo na Nzambi ya Ngolo nyonso.” Mu telemaka na yandi na kundima ya yandi. Mu telemaka kuna na Stonewall Jackson. Ya kele kieleka.

¹⁵⁸ Mu vwandaka na Boston Tea Party. Mu sadisaka na kulosa ndambu ya Ti Britannique na mubu. Mu zolaka vwanda, samu na kuvwanda Américain. Yinga, tata. Yinga, tata. Mu dodikaka na Nsamunu ya Kimpwanza, na Thomas Jefferson. Mu bulaka Ngunga ya Kimpwanza, na kilumbu ya 4 na Ngonda ya sambwadi, na mvula 1776.

¹⁵⁹ Mu me kukitalisa na nsoni ya yisi na revolution ya yawu, ntangu mpangi nwanisaka mpangi, mpe tata na mwana. Mu fwana kukitalisa na nsoni ya yawu, mutindu mosi mu me kukitalisa na nkembo ya yawu. Ya kele kaka ya kieleka.

¹⁶⁰ Mu vwandaka na Wake Island na ntangu basoda nyonso yayi zimbisaka baluzingu ya bawu. Mu monaka bawu kusala yawu. Mu monaka bawu ntangu bawu bakaka Wake Island. Mu sadisaka na kutelemisa dalapo na Guam. Ya kieleka.

¹⁶¹ Nyonso yina yawu vwandaka, mpe nyonso yina yandi salaka, nyonso yina yawu kele ntangu yayi, na ngolo nyonso mu ke tuba ti mu kele ndambu ya yawu, samu ti mu kele na kyese na kuvwanda Américain. Beno ve?

¹⁶² Na kuvwanda Muklisto, mu fwana vwanda mutindu mosi. Alleluia! Yinga, tata. Kana mu kele Muklisto, na yina mu longaka Nsangu ya mbote mpe kebisaka na balusambusu yina vwandaka kwiza, na Noé. Yinga, tata. Mu vwandaka ndambu ya yawu na bilumbu yina kuna, na kati kuna. Mu vwandaka ndambu ya ekonomi ya Nzambi.

¹⁶³ Mu vwandaka na Moise na divunda ya tiya. Ba basisaka munu na Egipte na Moise. Mu kimaka na ntoto ya kuyuma, mpe mu vwandaka na yandi na divunda ya tiya. Mu kuwaka ndinga ya Yandi. Mu monaka nkembo ya Yandi. Mu monaka Dikunzi ya Tiya kuna na divunda yina na kilumbu yina kuna, vwandaka zonza na Moïse.

¹⁶⁴ Mu vwandaka na yandi na Nzadi ya Mbwaki ntangu yawu zibukaka. Mu monaka Dikunzi ya Tiya kuvwanda na zulu ya Mongo ya Sinaï. Mu kudyaka mani na ntoto ya kuyuma mpe kunwaka na ditadi yina ba bulaka. Alleluia! (Mu ke na kukitala ve kele na bamvula makumi tanu ntangu yayi.) Amen. Yinga, tata. Mu kudyaka mani na ntoto ya kuyuma, na bana ya Hébreux na bilumbu yina kuna na ntoto ya kuyuma. Mpe mu kunwaka maza na ditadi yina mosi ba bulaka.

¹⁶⁵ Mu telemaka na Josué na suka yina ntangu yandi vwandaka tala bibaka ya Jéricho, mpe yandi monaka Muntu ya kutelama. Yandi basisaka mbele ya yandi mpe kwendaka mbangu na

kukutana na Yandi. Yandi tubaka, “Nge kele ya beto. Nge kele na mbeni ya beto?”

¹⁶⁶ Yandi tubaka, “Mu kele Kapitene ya basoda ya Mfumu.” Mu monaka Josué kulosaka mbele ya yandi na ntoto. Mu fukamaka na Josué ntangu mu fukamaka na ntwala ya Yandi, Kapitene ya Mfumu ya basoda ya Yandi. Mu monaka bibaka ya Jéricho kubwa, na muningu ya mpungi.

¹⁶⁷ Mu monaka Josué, yandi tubaka, “Mwini, vwanda swi. Mpe, ngonda, telega na Gabaon. Kuningana ve.” Mu monaka mwini kutelama swi, mpe ngonda kondwa kupesa nsemo ya yawu. Mu monaka nyonso yina kusalama.

¹⁶⁸ Mu vwandaka na Daniel na dibulu ya bankosi; na bana ya ba-Hebreux na dibulu ya tiya.

¹⁶⁹ Mu vwandaka na Elie, kuna na ntangu yinza ya muvimba mangaka yandi, mpe Achab mpe ba-Jézabel ya bawu na bansuki ya bawu nyonso ya kuzenga mpe bima ya kilumbu yina, na ba-fard ya bawu mpe bamfututu ya bawu, na nyonso yina vwandaka na dibuundu. Mu telemaka na Elie, mu samunaka nsangu ya kuvedila mpe ya bunkete, na Ndinga ya Nzambi. Alleluia! Mu vwandaka na yandi na Mongo ya Carmel ntangu yandi vwandaka ya kutelama kuna yandi mosi. Mu monaka yandi kusambila tiya kukatuka mazulu.

Mu vwandaka na David ntangu yandi kufwaka Goliath. Nkembo na Nzambi!

¹⁷⁰ Mbote, kana mu kele Muklisto, mu kele ya kukitalisa na nyonso yina. Mu fwana vwanda ndambu ya yawu. Yinga, tata.

Mu pesaka profesi na Esaie na kilumbu ya yandi.

¹⁷¹ Mu vwandaka na Jean na Jourdain ntangu yandi monaka yembe kukulumuka na zulu ya Yandi. Mu telemaka na Jean na Jourdain.

¹⁷² Mu monaka Yandi kubelusa bambevo; kuvumbula Lazare; kuvutula dyaka na luzingu mwana ya kento ya Jairus, na manima yandi vwandaka ya kufwa. Mu monaka yawu.

¹⁷³ Mu ke kukitalisa na Yandi na lufwa ya Yandi. Mu kufwaka na Yandi ntangu Yandi kufwaka na Calvaire, mpe mu vumbukaka dyaka na suka ya Paki na Yandi, na ngolo ya mvumbukulu ya Yandi. Mu kele mhangi ya yawu na nkokila yayi. Mu kufwaka na Yandi na Calvaire, vumbukaka na Yandi na Paki. Alleluia! Na kuvwanda ndambu ya Yandi, mu fwana vwanda ya kukitalisa na Yandi. Mu kukitalisaka na Yandi na kati ya lufwa ya Yandi. Mu kukitalisaka na Yandi na kati ya bampasi ya Yandi. Mu kukitalisaka na Yandi ntangu ba-denomination mangaka Yandi. Mu kukitalisaka na Yandi ntangu ba basisaka Yandi na tempelo, ntangu ba mekaka na kulosa, na kumanisa na Yandi. Mu vwandaka na Yandi kuna. Mu vwandaka na Yandi na lufwa ya Yandi, vumbukaka na Yandi na mvumbukulu.

174 Mpe mu vwandaka na nkama na makumi zole ntangu bawu mataka na kivinga ya zulu. Yinga, tata. Mu vwandaka mbangi ya mupepe ya ngolo yina katukaka na Mazulu. Mu zonzaka na bandinga na bayina vwandaka ya kupakula na Kilumbu ya Pentecote. Alleluia! Mu vwandaka kuna samu mu kukitalisa na Yandi. Nkembo na Nzambi! Ya kele kieleka. Mu longaka na Pierre, na Actes 2. Oh, mu longaka na yandi kuna.

175 Mu longaka na Paul na Mongo ya Mars, na ntwala ya mivwenzi. Yinga, tata. Mu zolaka vwanda.

176 Mu vwandaka na Jean na Kisanga ya Patmos. Mu monaka vision ya Nkwizulu ya Yandi. Mu kele. Mu—mu monaka Luther. Mu vwandaka na yandi na ntangu ya kusungika.

Mu vwandaka na Wesley.

177 Mpe ntangu yayi mu kele awa na Yuma, na Arizona. Alleluia! Mu me kukitalisa na nkokila yayi, awa na Motele Stardust, na kimvuka ya bantu yina ke kwikila kima mutindu mosi. “Mpe ntangu yayi beto me vwanda kintwadi na bisika ya Mazulu na kati ya Klisto Yesu.” Alleluia! Mu ke na kovingila na Nkwizulu ya Yandi na nkembo, mosi ya bilumbu yayi. Kukitalisa na Yandi!

Na kuzingaka, Yandi zolaka munu; na
kufwaka, Yandi vuukisaka munu;
Na kuzikamaka, Yandi nataka ntama masumu
ya munu;
Na kuvumbukaka, Yandi vedisaka ya mpamba
ya kuonda nsuka:
Kilumbu mosi Yandi ke kwiza—oh, kilumbu ya
nkembo!

178 Mu me kukitalisa ntangu yayi na mbotika ya Mpeve-Santu; kima ve awa na bala-bala, kima bamvula makumi yiya me luta. Mu kele na yawu na ntangu yayi, nkembo mpe ngolo ya Nzambi, ya mulemvo ya masumu. Mu ke mona Yandi kubelusa bambevo, kuzibula meso ya bampofu, kumona Yandi kutuba bima na ntwala, kutanga bantima ya bantu. Mu me kukitalisa na Yandi na ministele ya Yandi na kilumbu yayi. Nkembo na Nzambi! Mu me kukitalisa na Yandi, samu na luvukulu na kilumbu yayi ya nsuka. Mu ke na kivuvu na kuvwanda ndambu ya Kento ya nene ya makwela yina ke na kwiza mosi ya bilumbu yayi.

179 Ata yina yinza lendaka tuba, ba lendaka bokila beto “bilawu, bizoba, to Belzebul, to ba-eretiki,” nyonso yina ba zola. Mu zola dyaka kukitalisa na kimvuka yina. Mu kele dyaka kuna. Mu ke vwanda kuna. Mu butamaka kuna. Mu zola kuvwanda kuna. Mu ke vwanda ntangu nyonso kuna, samu ti Nzambi tulaka munu kuna. Mu kele. Mu me bika dibuundu ya munu, samu na kukitalisa munu mosi na nkonga ya ba-exalté. Mu kele mosi ya bawu. Mu me kukitalisa na bawu.

Bawu ke tuba, “Billy, nge me zimbisa mabanza ya nge.”

¹⁸⁰ Ya lendaka vwanda, kasi mu me mona dibanza ya Klisto. Mu me mona Ndinga ya Yandi, me mona Mvwandulu ya Yandi, me mona ti Yandi kele mutindu mosi mazono, bubu yayi, mpe kukonda nsuka! . . . ke kipe ve yina muntu yankaka ke banza samu na yawu. Yayi kele munu. Mu kele yandi yina fwana talisa kutalisama ya munu. Mu me kukitalisa na Yandi, na nzila ya Ndinga ya Nzambi. Yandi tubaka, “Bidimbu yayi ke landa bayina ke kwikila.” Mu kele na kyese mu me kukitalisa na yawu. Yinga, tata.

¹⁸¹ Beno zaba, mfumu yayi yina vwanda bulaka violon, kilumbu mosi, beno me kuwaka disolo, bawu vwandaka na violon mosi ya ntama mpe vwanda zola kuteka yawu na bazashere, bawu zolaka kuteka yawu, mpe muntu mosi ve vwanda zola kusumba yawu. Ba tubaka, “Nani ke pesa dollar mosi? Nani ke pesa dollar mosi na ndambu?” Na nsuka, “Na kukwendaka mbala mosi, na kukwendaka bambala zole, dollar mosi na ndambu.”

¹⁸² Na nsuka bakala mosi ya kiboba ya bansuki ya mpembe basikaka na kati ya bantu. Beno zaba disolo. Yandi bakaka yawu, yandi tubaka, “Beno bika mu kuzwa yawu.” Yandi me tula mwa colophane na yinti ya yandi, mpe me bula yawu ntangu fyoti. Bantu bandaka na kudila. Maza ya meso bandaka na kubwa na bizizi ya bawu, mutindu yina.

¹⁸³ Mpe na ntangu bawu salaka mutindu yina, muteki na bazashere bakaka dyaka yawu, na kutubaka, “Nani ke tuba mosi,” muntu tubaka, “funda ya ba-dollar, mafunda zole, mafunda tanu?”

¹⁸⁴ Yinki vwandaka luswaswanu? Mulongisi, yandi yina zabaka yawu, yandi yina salaka yawu, yandi zabaka mutindu ya kubasisa na yawu yina vwandaka na kati ya yawu.

¹⁸⁵ Mpe ntangu nyonso yina beto ke meka na kubasisa mabuundu ya beto na ba-credo mpe na ba-denomination, beto ke lenda ata mbala mosi ve. Beno bika Mfumu Mutungi ya bantu, Yina salaka muntu na kifwani ya Yandi mosi, Yina ke na kutungilaka Yandi Kento ya makwela samu na kima mosi, beno bika kubula ya Yandi ya Mpeve-Santu kusimba Ndinga yayi na kati ya ntima ya beno mbala mosi, mpe ya ke vwanda kifwani ya beto ya kulutula mbote. Ata lutangu ya mabuundu ya nene yina beno ke kwendaka, mpe lutangu ya bankumbu kele na buku, ya ke sala mingi samu na Yesu Klisto kulutula mabuundu nyonso, mpe ba-denomination, mpe ba-credo, mpe mabuundu ya yinza, mpe ba-organisation, na yinza ya muvimba.

¹⁸⁶ Yandi ke na kusalaka Kento ya makwela. Yinga, tata. Yandi ke na kukatulaka bima ya fyoti-fyoti ntangu yayi, ke na kukatulaka yinza. Oh, kumaka ya dibuundu, mpe ba-credo, mpe ba-denomination, mpe ba-dogme, nyonso yina ba fwana katula na Dibundu; mabanza ya bawu ya misiku, kuswaswana ya bawu, malongi ya bawu mpe nyonso. Beno vutuka mpe beno bika

Mfumu kubaka yinti. Beno bika Mfumu kubaka beno na maboko ya Yandi, kubula Ndinga, kutuba, “Yesu Klisto kele mutindu mosi mazono, bubu yayi, mpe kukonda nsuka.”

¹⁸⁷ Beno tuba, “Amen, Mfumu. Sala munu, yidika munu, sala munu, Mfumu, yina mu fwana vwanda.” Na yina ya ke vwanda na kima ya mutindu yankaka.

¹⁸⁸ Na yina, “Kana Mu zanguka na ntoto, Mu ke benda bantu nyonso na Munu.” Yinga, tata.

¹⁸⁹ Yandi ke na kuzengaka beno ntangu yayi, ke na kuzengaka kaka beno na Ndinga ya Yandi, ke na kuzengaka ba-credo nyonso mpe ba-dogme nyonso mpe nyonso, na beno, na kumekaka na kuvutuka na kuzwa Kento ya makwela samu na Mwana, kisalu ya kulunga yankaka, ndambu ya Ndinga. Ndinga.

¹⁹⁰ Yesu zolaka baka kisika ve. Beno ke bambuka moyo ntangu ba tangaka kilumbu yina na buku? Yandi tangaka kaka ndambu ya profesu, bikaka yankaka samu na bilumbu ya nsuka. Beto fwana baka ndambu yina.

¹⁹¹ Na yawu, beno me mona, Yandi me zenga, zola kuzenga Dibuundu, kaka mutindu Yandi salaka Mwana, mutindu Yandi salaka Kento ya makwela mpe Bakala ya makwela. Samu na kuvwanda Kento ya Yandi ya makwela, beno fwana vwanda ndambu ya Yandi. Ve ndambu ya credo, ve ndambu ya dibuundu, ve ndambu ya denomination, kasi ndambu ya Yandi. Kuzengana na mutindu mosi yankaka ya mutindu, ya ke simba ve. Beno fwana vwanda ya kuzenga na Ndinga. Kuzenga yinza na beno, mpe kubika kaka Ndinga kuzinga na kati ya beno.

¹⁹² Kisadi-biteki ya nene ke na kutalaka na beno, na kuzolaka kutelema mpe kuzwa beno ya kuzenga na mutindu ya misiku ya Yandi yina Ndinga ya Yandi ke lomba. “Na bilumbu ya nsuka Mu ke mwangisa Mpeve ya Munu na zulu ya nsuni nyonso. Bana ya beno ya babakala mpe bana ya bakento ke pesa profesu.” Klisto kele Kisalu ya kulunga yina me talisama ya Ndinga me kuma nsuni. Ba ke lomba beno na kukitalisa beno mosi na kati ya Yandi, na nzila ya Ndinga mosi, samu na kuvwanda kisalu ya kulunga samu na Kento ya makwela.

¹⁹³ Ntangu yayi, bampangi, Nzambi wandaka na kisalu ya kulunga kuna, na kulakisa na yinza, ntangu yayi Yandi ke na sosa kisalu ya kulunga bubu yayi. Beno zola? Beno me kubama, nkundi ya munu ya Muklisto? Beno ke ndima ya kieleka ti luzingu ya beno ke na kutalisa ya kieleka Klisto, ata yina yinza ke tuba. Bawu ke tuba, “Beno me zimbisa mabanza ya beno. Beno me kuma kilawu. Beno me kwenda mpe me kuma ya nkonga yina ya ba-exalté.” Beno landa yawu ve.

¹⁹⁴ Kana beno me vuuka ya kieleka ve, mpe na kati ya Nzutu yina, mpe Ndinga ya Nzambi na kati ya beno mpe ke na kutalisa Yawu mosi ve, mpe Luzingu ya Klisto ke na kutalana ve na beno;

mpangi ya bakala, mpangi ya kento, beno bika siansi yina ve. Mu ke kipe ve yina beno kele, wapi mutindu ya banzingulu kele na beno, beno bika ti Ndinga yina kotalana na beno konso kilumbu, samu ti Nzambi, na bilumbu ya nsuka yayi, ke na kubakaka Kento ya makwela samu na Mwana ya Yandi, Yesu Klisto.

Beto kulumusa bayintu ya beto.

¹⁹⁵ Tata ya Mazulu ya luzolo, wapi mutindu ya ngolo mingi na ntwala ya nkonga ya bantu ya mayele. Ndongosolo ya munu kele kulunga . . . kele ya kulunga ve, Mfumu. Mu ke sambila ti Mpeve-Santu ya nene ke kotisa bandinga yayi na kati ya bantima ya bantu, ti bawu ke mona yina mu zola kutuba, kana bawu me lenda ve kubakula na mutindu ya munu ya kuzenga bima, Mfumu. Kasi, na kati ya ntima ya munu, mu—mu ke mona yina Nge ke—yina Nge ke na kumeka na kusala.

¹⁹⁶ Mu ke kwikila, Tata, Kento ya makwela fwana vwanda ndambu ya Bakala ya makwela. Yandi fwana vwanda mutindu mosi na Bakala ya makwela, samu ti yandi kele ndambu ya Yandi. Yandi lenda ata mbala mosi ve, ata mbala mosi ve kuvwanda Kento ya Yandi ya makwela tii yandi ke kuma ndambu ya Yandi. Mpe yina kele ndambu ya Ndinga, bubu yayi, yina ke tuba ti Yandi kele mutindu mosi mazono, bubu yayi, mpe kukonda nsuka.

¹⁹⁷ Mbuma ya ble yina zingaka mbala mosi na ntoto, mpe kubwaka na ntoto, vumbukaka na kifwani ya mbuma yina kotaka na ntoto. Mpe, Mfumu, na Kilumbu ya Pentecote kuna basikaka Dibuundu mosi ya nene. Kuna kwizaka mbuma yankaka ya blé, samu na kukuma Bakala ya makwela mpe Kento ya makwela ya kilumbu ya nsuka.

¹⁹⁸ Beto me tala, ya kubwaka na kati, samu na Yandi, bamvula funda mosi. Kubanda na kimvuka ya Nicée, yawu vwandaka pola na ntoto.

¹⁹⁹ Bantu ya kutonga sonikaka buku, *Nzambi Ya Swi*, “Yina zolaka bika bana ya fyoti kufwa, mpe ba kufwa na bankosi, mpe ba yoka. Mpe minwani kufwaka Baklisto, mpe yokaka bawu na bapoto.” Kana muntu yina vwandaka kaka na lubakusu ya kimpeve!

²⁰⁰ Ble yina zolaka pola na ntoto, kasi yawu basikaka dyaka, ve na mutindu yina yawu kotaka na yisi. Yawu kwendaka na yisi na mutindu ya mbuma ya ble, kasi, ntangu yawu basikaka, ya vwandaka na binamina, mutindu ble ya ntwenya yina ke basikaka.

²⁰¹ Na nsuka yawu kulaka, kubanda Luther tii na Zwingli, mpe landila mutindu yina, mpe na nsuka me kuma fololo ya blé. Yawu sobaka yawu mosi na bilumbu ya Wesley. Talanaka mwa fyoti mingi mutindu ble, mpe mingi mutindu yawu kuluta binamina salaka. Ya ke na kuvutuka dyaka na yawu mosi.

²⁰² Na manima beto ke mona, ya me menisa, mbuma, talanaka pene mingi mutindu mosi ya kieleka. Mpe kana beno kwenda kuna mpe kukatula mpusu, beno ke mona. Ti mbuma ya ntete ya ble kele na mbuma ve na kati ya yawu, na mutindu nyonso. Ya kele mpusu, dikasa. Mfumu, reveil ya nene ya Pentecote yina salamaka, ya zolaka vwanda mutindu yina, Mfumu, samu na kukeba Blé ntangu ya ke kwiza. Ya vwandaka na ata kisika samu na Yawu na kukwenda.

²⁰³ Ntangu yayi, Tata, beto zaba ti beto ke baka bima nyonso na nzila ya yinza, samu ti Nge salaka yinza. Nge vulusaka ntoto: na mutindu Nge botikaka yawu, na bilumbu ya Noé, na manima ya kulonga ya yandi; Nge losaka Menga ya Mwana na zulu ya ntoto, samu na kusantisa yawu samu na Nge mosi; mpe na nsungi ya nene ke na kwiza, na kuvutula ya malu-malu, Nge ke yoka yawu na tiya, samu na kuyoka bima nyonso ya yinza. Mutindu Nge ke salaka Muklisto, Nge ke vuukisa yandi: ke botika yandi; ke santisa yandi; na manima kuvutula malu-malu yinza na yandi, mpe ke tuba yandi kuna mutindu Nge mosi, na kutulaka Mpeve-Santu na kati ya yandi.

²⁰⁴ Beto zaba ti blé yayi me luta na nzila ya mutindu mosi. Konso kima na yinza ke salaka mutindu mosi. Ntangu yayi, Mfumu, ntangu beto ke mona mpusu ntangu yayi kukatula Mbuma, kukwenda na mutindu ya yinza, O Nzambi, sala ti bambuma yina ke . . . Mpusu fwana katuka, samu ti mbuma kukwenda na Ntwala ya Mwana. Mu ke na kuwa nkwizulu ya masini ya kuyonzika, Mfumu. Ya ke vwanda ntangu ya yinda ve. Mpe kuna masini ya nene ya kubaka ke kwiza baka Kento ya Yandi ya makwela na nkembo, na Mvwandulu ya Nzambi.

²⁰⁵ Mu ke sambila, Tata, ti Nge ke sakumuna mosi na mosi ya beto. Ti beto bambuka moyo, Mfumu, ti yayi kele bweso ya beto. Beto lendaka kuzwa mosi ve mbasi. Bubu yayi kele bweso ya beto. “Bubu yayi, na manima ya ntangu mingi, ntangu beno ke kuwa Ndinga ya Yandi, beno kanga ve ntima ya beno.” Mfumu Nzambi, mu zaba ve bantu yayi. Kana ya kele na mosi awa, me kondwa yayi, sala ti na nkokila yayi ti bawu kuzwa muvimba ya Nzambi, mpe ti bawu fuluka na Mpeve-Santu. Pesa yawu, Tata.

²⁰⁶ Ntangu yayi na bayintu ya beto ya kukulumusa, na bantima ya beto ya kukulumusa, mpe. Bankundi, beno lemvočila munu na mutindu ya munu ya kuzenga nsangu. Mu—mu ke sambila ti Nzambi ke talisa beno kaka yina mu zola kutuba. Ntangu yayi, kana . . . Mu ke zola ve ti muntu kutala. Beno bika kaka bayintu ya beno ya kukulumusa. Mu zaba ve. Ata nani beno kele, kana beno ke kwikila ve ti luzingu ya beno . . .

²⁰⁷ Ntangu yayi, beno me mona, mosi na mosi ya mitindu yina, yinki yawu me sala? Yawu kumaka organisation. Yinki Yawu salaka? Mpeve me kwenda, na yankaka. Kaka na ntangu Luther salaka organisation; Yawu kwendaka mbala mosi na Wesley.

Wesley salaka organisation; Yawu kwendaka mbala mosi na Pentecote. Pentecote salaka organisation; wapi kisika Yawu ke na kukwenda? Kaka mutindu Dikunzi ya Tiya, ke landila kaka na kukwenda na ntwala.

²⁰⁸ Mpe bantu mosi, bawu ke tuba, “Mu kele Pentecotiste.” Ya kele mbote. “Mu kele Luthérien.” Ya kele nyonso ya kulunga. Ya kele na dyambu ve na yawu.

²⁰⁹ Kasi, nkundi, nkundi, Ble ke na kulandila dyaka na kukwenda na ntwala. Beto me kuzwa mosi ya ba-reveil ya kulutula nene. Ya kele—ya kele mosi ya kulutula yinda. Disolo ke talisa ti reveil ke salaka kaka na kutala bamvula tatu. Yayi me vwanda bamvula kumi na tanu, to kulutula, ba-campagne ya nene ya kubeluka, kasi ya kota madidi ntangu yayi. Beno tala! Konso reveil ntangu nyonso ke salaka organisation na manima ya yawu. Samu na yinki yayi ve? Ya kele na mwa nkonga mosi ya bampangi yina bandaka na kutelama, kisika mosi awa, yina ba vwanda bokila Mvula ya Nsuka, ba kwendaka kisika mosi ve; ya sukaka kaka. Samu na yinki? Ya kele nsungi ya Blé, bankundi. Ya kele Blé. Ya kele na ministele na zulu ya ntoto yina kele kaka mutindu mosi yina kwendaka na kati ya ntoto kuna na mbandukulu, nzingulu ya kieleka ya pentecote.

²¹⁰ Mabuundu ke na kusala ba-organisation. Mpe mosi ke na kumeka na kutunga ya nene mingi kulutula yankaka, mpe kuzwa bamambeke ya kulutula mpe nyonso, ba-organisation, malembe-malembe. Beto ke mona yawu. Mu kele pentecotiste. Beto ke mona yawu kukatuka. Kasi yinki? Yawu fwana sala mutindu yina, samu Mwini kuzwa Mbuma. Kana ya vwandaka ve kuna, na kubanda, kana ya vwandaka ve na mpusu na ziunga ya yawu, ya zolaka vwanda ve na kisika ya kukwenda. Nzambi salaka yawu mpusu, beno me mona, mutindu disangu, mutindu blé, mutindu kima nyonso yankaka yina ke basika na bardane. Ntangu yayi, beno me mona, ya ke na organisation mosi ve me banda na manima ya yayi. Samu na yinki? Ya kele dyaka ve na ntangu samu na mosi. Beto me kuma na nsuka.

²¹¹ Mpe kana beno kele ve kaka ya kieleka kisika beno zolaka vwanda, mpe beno ke tuba, “Mpangi Branham, kana Nzambi ke kuwa kisambu ya nge samu na bambevo, mpe mu me kuwa yina Mfumu me sala na mvutu na bisambu . . .” Mpe beno me kuwa na bantu yankaka na yinza bubu yayi, yina ba sambilaka. Beno ke tuba, “Mu . . .Nge zola kusambila samu na munu, ti mu ke kuzwa nzingulu yina, Mpangi Branham? Ya lendaka vwanda ti mu ke mona dyaka nge ve.” Ya lendaka vwanda ti mu ke mona dyaka nge ve. “Kasi sambila ti mu ke vwanda kuna. Mu ke na kuwa kaka ve mutindu ti mu ke vwanda kuna ntangu yayi. Kasi mu ke zola ti nge sambila samu na munu, ti mu ke vwanda.”

²¹² Ntangu yayi, bayintu nyonso ya kukulumusa. Beno telemisa diboko ya beno, beno zola? Mfumu kusakumuna nge,

kusakumuna nge, mpe nge. Nzambi kusakumuna beno. Na kati ya kimvuka yayi ya bantu, mu banza, makumi tanu, ya lendaka vwanda, to makumi sambwadi na tanu ya maboko me telema.

²¹³ Ntangu yayi, Yesu ya Luzolo, Nge kele zuzi. Beto kele kaka milongi. Mu ke sambila, Nzambi ya Luzolo. Mpe—mpe kana mu kuzwa lemvo na meso ya Nge, pesa mvutu na kisambu ya munu. Nge me mona diboko nyonso me telama. Nge zaba yina vwandaka na kati ya ntima ya bawu. Beto ke kwikila ti ba kubikaka bawu na Luzingu. Mpe Satana, kaka mutindu mosi na bilumbu ya Adam, yandi ke na kumeka na kukanga kisalu ya kulunga yina na kubasika. Ti ya suka na nkokila yayi. Ti Menga ya Yesu Klisto kukanga yawu, mpe ti bawu kubasika mutindu kisalu ya kulunga samu na Nzambi. Pesa yawu, Tata.

²¹⁴ Ti bawu kukitalisa na Ndinga ya Klisto. Yandi tubaka, “Kana muntu butuka dyaka...” Ti bawu kuzwa nzingulu yina kutuka dyaka. Ti bawu kuzwa mbotika ya Mpeve-Santu, kuvutula ya malu-malu ya bima nyonso ya yinza. Bawu zola dyaka yawu ve, Mfumu. Katula yinza nyonso na bawu, mpe basisa bawu mutindu kisalu ya kulunga na ntwala ya bantu. Pesa yawu, Mfumu, samu ti Nge ke vwanda na kyese na nsungi yayi ya nsaba na bilumbu ya nsuka awa, samu na kutalisa kisalu ya kulunga ya Nge ya babakala mpe bakento yayi, ya bana ya babakala mpe bana ya bakento, yina me telemisa diboko ya bawu. Pesa yawu, Mfumu.

²¹⁵ Sakumuna reveil yayi yina ke na kusalama na mbanza. O Nzambi, mu ke sambila ti konso bakala mpe kento, yina kele pene-pene ya kizunga, ke kwiza kutala reveil yina. Mpe ti mosi na mosi ya bawu kuvwanda ya kufuluka na Mpeve-Santu, mpe ti ya vwanda na reveil ya mutindu ya ntama ke kombola mwa mbanza yayi awa, ti bantu na bisika yankaka ke kwiza. Pesa yawu, Mfumu. Pesa beto bima yayi, Tata, samu ti beto me lomba yawu na Nkumbu ya Yesu. Amen.

²¹⁶ Mu zola Yandi. Mu zola Yandi. Beno zola Yandi? Beno zaba, Paul tubaka, “Kana mu yimba, mu ke yimba na Kimpeve.” Mu ke kukiyufula. Mu kele ntama na kuvwanda muyimbidi. Kasi mu ke kumiyufula, kintwadi, kana beto lendaka ve kubanda nkunga yina, *Mu Zola Yandi*. Nge lenda pesa beto noti, mpangi ya kento? “Samu Yandi zolaka munu ntete.” Beno me kuwaka yawu. Bantu yikwa zaba yawu? Beto mona ya beno... Ya kele mosi ya bankunga ya munu ya ntama. Mu ke zolaka kuyimba yawu. Mbote mingi.

²¹⁷ Ntangu yayi beto kulumusa kaka bayintu ya beto mpe beto kanga meso ya beto, mpe beto yimba ntangu yayi, *Mu Zola Yandi*.

Mu zola Yandi, mu zola Yandi
Samu Yandi zolaka munu ntete

Mpe futaka mpulusu ya munu
Na yinti ya Calvaire.

218 Beto yimba yawu na kati ya yinwa. Kilumbu mukyama ke komba zulu. Ya ke vwanda na mpungi ke wakana. Bantu ya kufwa kati na Klisto ke vumbuka. Oh, mutindu beto ke zola Yawu kuna!

Mpe futaka mpulusu ya munu
Na Calvaire.

219 Ya kele kisika Yandi ke vwanda Kisalu ya kulunga samu na beto.

220 Beno bambuka kaka, bisalu ya kulunga nyonso, ntete ba tula yawu na kivinga na muze, ba fwana lutisa yawu na kivinga ya kutonga, na kubanda. Mitongi fwana mona kana bawu lenda tonga yawu. Kasi ntangu ya ke lenda kutonga, kuna ba ke nata yawu na kivinga ya muze. Mwana ya Nzambi lutaka na nzila ya ya kutonga ya konso organisation, denomination, mpe tii Pilate tubaka, “Mu me tala ata foti ve na yandi.” Judas tubaka, “Mu me yekula Menga ya muntu yina zaba dyambu ve.”

221 Na yina Nzambi vumbulaka Yandi, mpe Yandi kele ya kunamika na kivinga ya nene ya muze bubu yayi, na diboko ya kibakala ya Nzambi, ke na kusalaka kubondila. Beno zola ve kukutana na Yandi kuna? Beno zola ve kuvwanda ndambu ya yawu? Beno lenda vwanda. Ba me bokila beno na kuvwanda. Na yina beto ke na kuyimbaka nkunga yayi, samu na yinki beno lenda tuba yawu ve na Yandi na ntangu yayi.

. . . zolaka munu ntete
Mpe futaka mpulusu ya munu
Na yinti ya Calvaire.

222 Na yina beto ke yimba dyaka yawu, mu zola beno kupesana maboko na muntu na lweka yankaka ya mesa na beno ntangu yayi. Beno tuba, “Nzambi kusakumuna nge, nkundi ya Muklisto. Nzambi kusakumuna nge. Sambila samu na munu.” Mosi na mosi ya beno kusala yawu ntangu yayi, na yina beto ke yimba dyaka yayi.

Mu zola . . . (Sambila samu na munu. Sambila
samu na munu.) . . . zola Yandi
Samu Yandi . . .

223 Ya kele kieleka, beno pesana mbote, beno tuba, “Sambila samu na munu.” Beno nyonso sambila samu na munu. Mu zola kuvwanda kuna, na mutindu ya kulutilla.

Mpe futaka mpulusu ya munu
Na yinti ya Calvaire.

224 Ntangu yayi beto kulumusa bayintu ya beto mpe beto kanga meso ya beto, mpe beto telemisa maboko ya beto mpe beto yimba yawu na Yandi ntangu yayi.

Mu . . . (O Nzambi!) mu zola Yandi
 Samu Yandi zolaka munu ntete
 Mpe futaka mpulusu ya munu
 Na Calvaire.

Beno tala na Kisalu ya kulunga ya beno yina kele ya kulelika kuna.

²²⁵ Kisadi-biteki ya nene, Nzambi ya nene Yina salaka muntu, mpe yidikaka yandi mpe bongisaka yandi na kifwani ya Nge mosi, Mu ke sambila Nge, Mfumu, ti Nge ke baka beto na nkokila yayi. Bika ti yayi kuvwanda nkokila ya lubambuku, kieleka ya lubambuku samu na beto, ti, na nkokila yayi, Mfumu, na nkokila yayi, kaka awa na Motel Stardust, ti Nge yidika bantu na kifwani ya bana ya Nzambi. Pesa yawu, Mfumu. Kisadi-biteki ya nene, Nge kele Yina kaka lenda sala yawu. Baka Ndinga ya Nge, Mfumu, yidika kaka Yawu na kati ya bantima ya beto nyonso, ti beto lenda vwanda bisalu ya kulunga ya Nge na bilumbu ya nsuka, mpe ba ke bokila beto Kento ya makwela ya Klisto. Bantu yankaka lendaka mona ti ya kele na kieleka mingi mpe kyese mingi na kuzingaka samu na Yandi.

²²⁶ Mfumu, bubu yayi, ti mabuundu ya beto mpe, bawu ke na kukondwa bukieleka ya bawu. Bawu kele ve . . . Ya ke monana ti, yawu nyonso me kwenda na Hollywood, Mfumu, yinki me salama? Bawu me landa kima ke ngenga na kisika ya yina ke lezima. Beto zaba ti yinza ke kungenga na mutindu ya yinza. Kasi Nsangu ya mbote ke lezima na zola mpe na Klisto. Pesa, Mfumu, ti beto ke kwenda ntama na kungenga ya yinza, mpe kukota na kulezima ya Klisto.

²²⁷ Ba kele ya Nge, Mfumu. Nge futaka samu na bawu. Nge . . . Ba me telemisa diboko ya bawu, na nkokila yayi, samu ba me zola kuvwanda. Ntangu yayi, Tata, mu . . . Kana mu lendaka, mu zolaka sala bawu yawu, kasi mu lenda ve. Kasi mu ke na kusala kivuvu na Nge. Nge tubaka, “Yandi yina ke kwiza na Munu Mu ke tula yandi ve na ngaanda. Yandi yina ke kuwa Ndinga ya Munu mpe ke kwikila na Yandi yina fidisaka Munu, kele na Luzingu ya kukonda nsuka, mpe ke kwiza ve na Lufundusu,” ve kukwikila ya kufwanikisa ntangu yayi, Mfumu, kasi kwikila, “yandi me luta lufwa na Luzingu.” Pesa yawu, Tata. Ba kele ya Nge, na Nkumbu ya Yesu Klisto. Amen.

²²⁸ Beno zola Yandi? Yandi kele mbote ve?

²²⁹ Pesa beto noti ya fyoti, to noti kuna, mpangi ya kento, *Mbote, Mbote.*

Beno zola kuyimba? Mu ke na kubaka ntangu mingi?

²³⁰ Mu ke zolaka kusambila. Beno ve? Mwa, Nsangu mosi ya ngolo mutindu yayi, munu ve . . . Beno zaba, mu ke yinaka kuvwanda ngolo. Kasi, beno, beno fwana bula ngolo nsonso, samu ya simba mbote. Beno zaba yina mu zola kutuba. Inga. Beno fwana kotisa yawu mbote awa. Mpe beno me mona?

²³¹ Beno zola nkunga yina? “Mbote, mbote, Yesu kele samu na munu.” Beno zaba yawu?

Mbote, mbote, Yesu kele samu na munu,
Konseye, Ntinu ya Ngemba, Nzambi ya Ngolo
kele Yandi;

Yandi ke vulusa munu, ke keba munu na
masumu mpe nsoni nyonso,
Mbote kele Mukudi ya munu, lukumu na
Nkumbu ya Yandi!

Mu zimbanaka mbala mosi, ntangu yayi mu me
talana, kukondwa kitumbu,
Yesu me pesa kimpwanza mpe mpulusu ya
muvimba;

Yandi ke vuukisa munu, ke keba munu na
masumu mpe nsoni nyonso,
Mbote kele mbote Mukudi ya munu, lukumu na
Nkumbu ya Yandi!

Muntu nyonso!

Mbote, mbote, Yesu kele samu na munu,
Konseye, Ntinu ya Ngemba, Nzambi ya Ngolo
kele Yandi;

Yandi ke vulusa munu, ke keba munu na
masumu mpe nsoni nyonso,
Mbote kele mbote Mukudi ya munu, lukumu na
Nkumbu ya Yandi!

²³² Ntangu yayi beto tuba, “Lukumu na Mfumu!” “Lukumu na Mfumu!” Beno ke kuwa ve ya kuzenga? Beno ke kuwa mbote? Beno sambila Mfumu. Yandi kele mbote.

²³³ Nzambi kusakumuna beno tii mu ke kutana dyaka beno. Mu ke vutula lukutakanu ntangu yayi na mpangi ya bakala, président.



KISALU YA NZAMBI YA KULUNGA YINA ME TALISAMA KNG64-1205
(The Identified Masterpiece Of God)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na nkokila, na kilumbu ya 5 ya Ngonda ya kumi na zole, na mvula 1964, na feti ya nene ya bayinsi nyonso ya Bantu ya Mumbongo ya Nsangu ya mbote ya Muvimba na Motel Stardust na Yuma, Arizona, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org